

四庫全書

史部

欽定四庫全書

史部

竹書統箋卷八至

十

詳校官編修臣范來宗

洗馬臣王坦修覆勘

總校官進士臣繆琪

校對官主簿臣汪日贊

謄錄監生臣王寶唐

欽定四庫全書

竹書統箋卷八

翰林院檢討徐文靖撰

康王

箋按周本紀成王崩太子釗立是為康王

名釗

箋按顧命曰王崩太保命仲桓南宮毛俾爰齊侯呂伋以二千戈虎賁百人逆子釗於南門之

外延入翼室恤宅宗蔡傳曰逆太子釗於路寢門外引入路寢翼室為憂居宗主也

元年甲戌春正月王即位冢宰召康公總百官

箋按書顧

命乃向召太保爽孔傳曰冢宰第一召公領之鄭注周禮曰百官總馬則謂之冢賈氏疏案經司書職曰

掌六典八法八則之藏以詔王及冢宰是藏王事總
衆職而稱冢也宰夫職曰乘其財用之出入凡夫財
用物辟名者以官刑詔冢宰而誅之是總衆官誅賞
而稱冢也又司會職曰以周知四國之治以詔王及
冢宰廢置是總四
國之治而稱冢也

諸侯朝于豐宮

箋按左傳曰康有豐宮之朝杜預曰鄆在始平鄆縣東有靈臺康王於是朝諸

侯括地志豐宮周文王宮也
在雍州鄆縣東三十五里

三年定樂歌

箋按定樂歌如周禮大司樂曰奏黃鍾歌
大呂以祀天神奏太簇歌應鍾以祀地示

奏夷則歌小呂以享先妣奏無射歌夾鍾以享先祖
是也又周頌序曰歌清廟以祀文王歌天作以祀先
王先公歌執競以祀武王歌思文祀后稷以配天歌
昊天有成命以郊祀天地如此類者必皆其所先定

耳

吉禘于先王

箋按閏公二年夏五月乙酉吉禘于莊公社注三年喪畢致新死者之主于廟廟之

遠祖當遷入祧因是大祭以審昭穆謂之禘是康王三年吉禘以三年喪畢即吉而行禘也

申戒農官告于廟

箋按詩序曰臣工諸侯助祭遣于廟也其詩曰嗟嗟保介維莫之春亦又

何求如何新畬朱子曰此戒農官之詩保介農官之副也疑即為康王申戒農官而告于廟之詩也

六年齊太公薨

箋按紂三十一年文王得呂尚以為師至是凡六十六年而薨皇覽曰呂尚冢

在臨淄縣城南去縣十餘里

九年唐遷于晉作宮而美王使人讓之

箋按郡國志太原晉陽本唐國

有龍山晉水所出地理通釋曰叔虞封唐子燮為晉侯徙居晉水傍在并州晉陽縣北二里國都城記云唐叔虞之子燮父徙居晉水傍改曰晉侯襄公三十一年傅子產相鄭如晉曰文公之為盟主也宮室畢庫無觀臺榭殆亦有鑒於此耶

十二年夏六月壬申王如豐錫畢公命

箋按左傳畢文之昭也郡縣志

畢原在京北府萬年縣西南二十八里蓋即畢公高之所封也書叙曰康王命作冊畢分居里成周郊作畢命唐孔氏疏曰漢初不得此篇有偽作其書以代之者漢書律歷志云康王十二年六月戊辰朔三日庚午故畢命豐刑曰惟十有二年六月庚午肅王命作策書豐刑亦不知豐刑何所道也余按成王十九年黜豐侯三禮圖說曰豐侯以酒亡國所言豐刑或此也又按鄭志答趙商曰周公左召公右兼師保故

成王周官稱三公為太師太傅太保若然太傅者畢公為之兼世子之官故稱太傅是以文王世子云太傅在前少傅在後此錫命畢公當亦由太傅為冢宰也

秋毛懿公薨

按周書克殷解武王入商毛叔鄭奉明水即毛懿公也

十一年錫齊侯伋命

按齊太公世家太公之卒百有餘年于丁公呂伋立徐廣曰伋一

作及按周公諡法述義不克曰丁

王南巡狩至九江廬山

按漢志豫章雩都縣湖漢水東至彭澤入江彭澤縣禹貢彭

蠡澤在西都陽縣鄱水餘汗縣餘水艾縣修水新淦淦水南城盱水建城蜀水宜春南水皆入湖漢太康地記曰劉歆云湖漢等九水入彭蠡因言九江太史公曰余嘗登廬山觀禹疏九江地理志廬江尋陽縣

禹貢九江在南東合為大江論語注蔡大龜也禹貢
九江納錫大龜史記龜策傳廬江郡常歲時生龜長
尺二寸者輸太卜官路史斬春江中有蔡山在廣濟
縣大龜納錫故曰蔡高崇文傳有蔡山羅華云斬水
縣北斬水尋陽舊治也則九江納錫亦在廬江故孫
叔廬山賦曰尋陽郡南有廬山九江之鎮也支曇詠
廬山賦曰縈以三湖帶以九江今括竹書康王南巡
狩至九江廬山九江可移而廬山之九江不可移蔡
仲默以九江在洞庭未見此矣或以禹貢九江孔
殷屬之荊州則九江應在洞庭殊不審漢至大別入
江經先言江漢朝宗于海後言九江孔殷則九江在
漢水入江之下矣導江東至于澧過九江至于東陵
則澧水不在九江之數故先至澧而後乃過九江也
蔡傳以澧為九江之一又以東陵即巴陵殊不審澧
自澧州東流至巴陵縣北五里洞庭湖在縣西南若
澧水亦為九江亦在東陵經何以言至澧過九江然

後至東陵乎郡國志江自尋陽分為九道
地志廬江金蘭西北有東陵鄉當從之

十九年魯侯禽父薨

箋按十九年九誤當作六皇甫謐曰伯禽以成王元年封四十六年

康王十六年卒今據竹書成王三十七年陟加以康
王十六年是封五十三年也魯世家云伯禽卒于考
公首立四年卒立弟熙是為煬公煬公以康王二十
一年築茅闕門則從前尚有四年宜屬考公伯禽之
薨不得在康
王十九年也

二十一年魯築茅闕門

箋按魯世家煬公築茅闕門徐廣曰茅一作第又作夷世本曰

煬公徙魯宋忠曰今魯國又春秋定公元年秋九月
立煬宮杜預曰煬公伯禽子也其廟已毀季氏禱而
立其宮書以譏之搜神記曰定公元年有九蛇繞柱
占以為九世廟不祀乃立煬宮又漢志煬公二十四

年正月丙午朔旦冬至殷歷以為丁酉括竹書則煬
公六年卒史記魯世家亦云六年無二十四益漢志
也誤

二十四年召康公薨

箋按應劭風俗通召康公與周同
姓武王滅紂封召公於燕成王時

入據三公出為二伯自陝以西召公主之當農桑之
時重為所煩勞不舍鄉亭止於棠樹之下聽訟決獄
各得其所壽百
九十餘乃卒

二十六年秋九月己未王陟

昭王

箋按周本紀康王崩
太子瑕立是為昭王

名假

假他本
多作瑕

元年庚子春正月王即位

復設象魏

箋按周禮太宰之職正月縣治象之法于象魏使萬民觀治象鄭司農云象魏闕也賈公

彦曰周公謂之象魏雉門之外兩觀闕高魏魏然今据竹書成王二十一年除治象至昭王元年凡四十

有四年而復設象魏故史記三代世表謂成康刑錯四十餘年又按此正月周十一月建子之月也周禮

小宰正歲帥治官之屬而觀治象之法鄭注曰正歲謂夏之正月是周時兼用夏正以正歲別之

六年王錫邠伯命

箋按周書王會解唐叔荀叔周公在左詩曹風下泉四國有王邠伯勞之

鄭箋云邠侯文王之子為州伯僖二十四年左傳邠文之昭也水經注涑水又西逕邠城詩云邠伯勞之

蓋其故國也服虔曰邠國在解縣東一統志邠城在平陽府猗氏縣

冬十二月桃李華

箋按漢書五行傳僖公三十三年十月李梅實劉向以為周十二月今

十月也李梅當剝落今反華實近草妖也

十四年夏四月恒星不見

箋按春秋莊七年夏四月辛卯夜恒星不見公羊傳曰恒

星者何列星也何休曰列星者天之常宿分守度諸侯之象周之四月夏之二月昏參伐狼注之宿常見參伐主斬艾立義狼主衡平也皆滅者法度廢絕威儀陵遲之象注即柳也天官書柳為鳥注

秋七月魯人弑其君宰

箋按魯世家煬公六年卒于幽公宰立幽公十四年幽公弟潰

殺幽公而自立是為魏公世本潰作弗魏作微

十六年伐楚涉漢遇大兕

箋按爾雅兕似牛郭注一角青色重千斤韋昭國語注兕

似牛而青善觸人楚策江乙說安陵君曰楚王遊於雲夢有狂兕踰車依輪而至亦是類也

十九年春有星孛于紫微

箋按司馬彪天文志曰紫宮天子之宮也客星犯謂之大

喪宋書符瑞志彗字紫微天下易主春秋文十四年有星孛入于北斗公羊曰孛彗星也昭十七年冬有星孛于大辰西及漢申須曰彗所以除舊布新也

祭公辛伯從王伐楚

箋按韋昭曰蔡畿內之國周公之後左傳桓七年祭公來杜預曰祭

公諸侯為天子三公者釋例曰祭城在河南上有教倉周公後所封也一統志祭城在鄭州城東北一十五里周公第五子所封此祭公蓋其後也漢志上黨郡有長子縣周史辛甲所封此辛伯蓋其後也

天大暄

箋按爾雅釋天陰而風曰暄詩終風且暄不日有暄毛傳陰而風曰暄

雉兔皆震

箋按屈原天問曰昭后成遊南土爰底厥利維何逢彼白雉朱子集注曰昭王南遊至楚

楚人鑿其船而沉之白雉事無所見舊注謂周公時越裳氏嘗獻之昭王德不能致而欲親往逢迎之今据竹書昭王十九年伐楚涉漢天大曠雉兔皆震當是厥利維何逢彼兔雉也汲冢未出世不知有雉兔事遂譌為白雉耳

喪六師于漢王陟

箋按僖四年左傳昭王南征而不復君其問諸水濱杜氏曰昭王時漢非

楚境故不受罪又按水經注沔水逕江夏雲杜縣東又東逕左桑昔周昭王南征船人膠舟以進之渡沔中流而沒死董道書跋曰叔繇鼎銘二十有三年王在宗周王命叔繇其曰王在宗周則知在幽王之前昭穆皆有二十三年則叔繇作器蓋在二王之世矣今据竹書昭王在位十有九年陟無二十三年豈彥

遠未見此耶一統志昭王陵
在登封縣少室山陽城西谷

穆王

箋按周本紀昭王南巡不返卒
于江上立昭王子滿是為穆王

名滿

元年己未春正月王即位

作昭宮

箋按昭宮穆王所作以祀昭王也陸佃禘雅曰
貝大者如輪穆王得其殼懸于昭觀即昭宮也

命辛伯餘靡

箋按呂氏春秋曰周昭王親將征荆蠻辛
餘靡長且多力為王右還反涉漢梁敗王

及祭公隕于漢中辛餘靡振王北濟反振祭公周乃
侯之于西翟高誘注引左傳云昭王南征而不復孔
仲達曰昭王為沒于漢中辛餘靡馬得振王北濟也
振王為虛誠如高誘之注今据竹書穆王元年命辛

伯餘靡則辛伯未没于漢其振王北濟又何疑焉又按左思蜀都賦起西音於促柱劉淵林注曰周昭王涉漢中流而隕其右辛遊靡振王遂卒不復還周乃侯其子于西翟實為長公楚徙宅西河長公思故處始作西音見呂氏春秋是亦誤也况呂氏于振王北濟下云周乃侯之于西翟與紀年合而孔氏正義反以振王為虛者誤也

冬十月築祈宮于南鄭

箋按祈當作祇穆天子傳曰仲冬壬辰至棗山之上乃奏廣樂

三日而終吉日丁酉天子入于南鄭郭璞注曰今京兆鄭縣也紀年穆王元年築祇宮于南鄭傳所謂王是以獲汜于祇宮者鄭即漢京兆鄭縣一統志古鄭城在華州鄭縣北稱南鄭者以鄭在鎬南也

自武王至穆王享國百年穆王以下都于西鄭

箋按書無逸言

殷之三王及文王享國若干年者皆謂在位之年呂刑云王享國百年髦荒乃自其生年而數若謂武王至穆王享國百年則髦荒將何指乎顏師古謂穆王下無都西鄭之事殊不知西鄭南鄭一也自鶴京視之則鄭在南自新鄭視之則鄭在西

六年春徐子誕來朝錫命為伯

箋按後漢書穆王分東方諸侯命徐偃王主之

偃王處潢池東地方五百里行仁義陸地而朝者三十六國太子賢曰水經注潢池一名汪水與泡水合至沛入泗自山陽以東海陵以北其地當之也括地志大徐城在泗州徐城縣北三十里古之徐國也

八年春北唐來賓獻一驪馬是生駮耳

箋按北唐戎國也周書王會解

北唐戎以閭即此北唐也穆傳曰天子之駮亦驪盜驪白義踰輪山子渠黃華駮綠耳郭注曰魏時鮮卑

餘定四庫全書
八
獻千里馬色白而兩耳
黃名曰黃耳亦此類耳

九年築春宮

附注王所居有鄭宮春宮○箋按初學記曰鄭宮春宮見紀年大約鄭宮即祗宮宮

在南鄭故因以名之王子年拾遺記曰穆王三十六年王東巡大駑之谷詣春霄宮集諸方士仙術之要所謂春宮者殆即此也

十一年王命卿士祭公謀父

箋按書叙曰周公云殛王制將衰穆王因祭祖不豫

詢某守位作祭公又周書有祭公解王曰祖祭公次予小子虔虔在位昊天疾威予多時溥愆公其告予懿德祭公稽首曰天子謀父疾維不瘳朕魂在于天孔晁曰祭公周公之後昭穆于穆王在祖列

十二年毛公班共公利逢公固帥師從王伐犬戎

箋按穆傳

曰天子至于鉞山之隊東升于三道之陞命毛班達
國先至于周即此毛公班達公固也又按共公利疑
作井公穆傳曰天子西征至于鄆人鄆栢絮且逆天
子于智之闕先豹皮十良馬二六天子使井利受之
又穆傳曰天子大朝於燕然之山河水之阿乃命井
利梁固韋將六師又天子北入於邠與井公博三日
而決即井公利也郭注疑井公為賢人而隱邠故穆
王就之遊戲謬矣達公達伯陵後昭二十年傳有達
伯陵杜注達伯殷諸侯姜
姓又按青州廣固有達城

冬十月王北巡狩遂征犬戎

箋按山海經黃帝魯孫弄
明生白犬白犬有牝牡是

為犬戎白犬人名也周本紀穆王將征犬戎祭公謀
父諫曰令自大畢伯士之終也犬戎氏以其職來王
天子曰予必以不享征之且觀之兵無乃廢先王之
勳而王幾頽乎王遂征之得四狼四白鹿以歸自是

荒服者不至

十三年春祭公帥師從王西征

箋按穆傳曰天子西征河宗伯大逆天子燕然

之山勞用束帛加璧先白闕天子使郟父受之郭注曰郟公謀父傳又曰仲夏庚寅天子西遊乃宿于郟郟公飲天子酒乃歌闕天之詩天子命歌南山有栲此皆祭公從王西征之事也

次于陽紆

箋按穆傳曰天子西征驚行至于陽紆之山河伯無夷之所都居是惟河宗氏又曰自宗

周渰水以西至于河宗之邦陽紆之山三千有四百里

秋七月西戎來賓

箋按墨子曰周穆王征西戎西戎獻昆吾之劍赤刃切玉如切泥孔叢子

子順對魏王曰周穆王大征西戎西戎獻火浣之布

徐戎侵洛

箋按後漢東夷傳徐戎偕號乃率九夷以伐宗周西至河上据穀梁傳注苞人民斨牛馬

曰侵左傳有鐘鼓曰伐無曰侵此侵洛當以下侵上而言洛謂洛邑也

冬十月造父御王入于宗周

箋按穆傳曰天子之御造父三百馱脩芍及傳又曰

癸酉天子命駕八駿之乘天子主車造父為御菌箇為右次車之乘栢天主車參伯為御奔戎為右天子乃遂東南翔行馳驅千里至于巨蒐乙亥天子南征陽紆之東尾栢天送天子至于鄴人天子五日休于淖澤之上以待六師之人戊午天子東征孟冬壬戌至于雷首癸亥天子南征升于髭之陞丙寅天子至于鉞山之隊癸酉天子命駕八駿之乘赤驥之駒造父為御周南征翔行選絕崔道升于太行濟于河馳驅千里遂入于宗周

十四年王帥楚子伐徐戎克之

箋按博物志徐偃王仁義著聞欲舟行上國乃

通溝江淮之間得朱弓矢以已得天瑞自稱徐偃王穆王遣使至楚使伐之偃王仁不忍鬪害其民走死

彭城武原縣東山下百姓隨之者萬數因名其山為徐山又按史記索隱曰譙周云徐偃王與楚文王同

時去周穆王遠矣言此事非實也今據周本紀由成王至穆王凡四代楚世家楚子熊繹與魯公伯禽衛

康叔子牟俱事成王繹生熊艾生熊鮒生熊勝勝以弟熊揚為後亦四五代則穆王時之楚子當是

熊勝熊揚何得疑為楚文王而云去穆王遠乎

夏四月王畋于軍丘

箋按穆傳曰丁丑天子里圃田之路庚辰次于軍丘以畋于藪

五月作范宮

箋按穆傳曰甲寅天子作居范宮以觀桑者郭璞曰范宮離宮之名也吳淑桑賦曰

范宮周
穆之遊

秋九月翟人侵畢

箋按穆傳曰季秋宿于房畢人告戎曰陵翟來侵天子使孟僉如畢討戎

傳又曰天子四日休于濩澤陵翟至賂良馬百駟歸畢之寶以詰其成陵子焉胡東牡郭璞曰陵翟隗

姓國焉胡名歸畢之寶言翟前取此寶也詰猶責也成謂平也

冬蒐于萍澤

箋按萍當作苹穆傳季冬丙辰天子蒐獵萍澤其卦遇訟達公占之曰訟之繇藪澤

蒼蒼其中關宜其正公戎事則從祭祀則意畋獵則獲關飲達公酒賜之駿馬十六緡紵三十篋

作虎牢

箋按穆傳天子北入于邴至于臺有虎在予葭中七年之士高奔戎請生捕虎而獻之天子命

為之柙而畜之東虞是為虎牢又按東虞誤當作東虢地理志河南成皋故虎牢或曰制師古引穆傳天

子畜之東號號曰獸牢是當為東號也春秋襄公二年遂城虎牢十年戌鄭虎牢即此也

十五年春正月留昆氏來賓

箋按穆傳天子四日休于濩澤于是射鳥獵獸丁丑

天子開雨乃至祭父自圃鄭來謁留昆歸玉百枚郭璞曰留昆國見紀年

作重壁臺

箋按穆傳曰姬姓也盛栢之子也天子賜之上姬之長是曰盛門天子乃為之臺是曰

重壁之臺郭璞曰盛國名公羊傳曰成者何盛也盛也者為諱之盛諱戚同姓者今盛栢為姬姓之長上位在上也壁臺言臺狀如壘壁

冬王觀于鹽澤

附注一作王幸安邑觀鹽池非是○箋按穆傳天子西絕鉏陞乃遂西南至于

鹽郭注鹽鹽池今在河東解縣楊佺期洛陽記曰河東鹽池長七十里廣七里

十六年霍侯舊堯

箋按世本霍國真姓後周武王封弟于霍為姬姓襄十九年傳晉女叔侯

曰虞號焦滑霍楊韓魏皆姬姓也地理通釋曰霍姬姓文王子叔虞所封在晉州霍邑縣穆傳霍侯舊告

堯郭注曰今在平陽

永安縣西南有城

王命造父封于趙

箋按趙世家趙之先有季勝生孟增幸于周成王是為宅卑狼其子衡父

生造父穆王使造父御西巡狩而徐偃王反穆王馳歸攻徐大破之乃賜造父以趙城正義曰晉州趙城

縣即造

父邑也

十七年王西征昆侖丘見西王母

箋按山海經海內昆侖之虛在西北郭璞

曰言海內者明海外復有昆侖穆傳曰吉日辛酉天子升于昆侖之丘以觀黃帝之宮丁巳天子西征癸

亥至于西王母之邦吉日甲子天子賓于西王母乙丑天子觴西王母于瑤池之上郭璞曰西王母如人虎齒蓬髮戴勝善嘯前漢地理志酒泉廣至縣有昆侖障金城臨羌縣有西王母石室仙海鹽池一統志崑崙山在肅州衛城西南二百五十里南與甘州山連其巔峻極經夏積雪不消世呼雪山十六國春秋張駿酒泉太守馬岌言酒泉南山即昆侖之丘也周穆王見西王母樂而忘歸即謂此山有石室王母堂珠璣鏤飾煥若神宮又按穆傳曰天子飲于溫山鳥角人郭注引紀年曰穆王見西王母西王母止之曰有鳥磅人令

本紀年無

其年西王母來朝賓于昭宮

箋按胡元瑞筆叢曰山海經稱西王母豹尾虎齒當

是人類殊別考穆天子傳天子賓于西王母西王母為天子謠天子執白珪元璧及獻錦組百純組三百

純西王母再拜受之則西王母服食言語並無所謂
豹尾虎齒之象又按紀年一書舜九年西王母來朝
穆王十四年西王母來朝賓于昭宮則西王母者一
西方諸侯國耳其謂之王母不過如多姐女真八百
媳婦之類無論虎齒豹尾事屬荒唐即如淵明
詩王母怡妙顏粲然啓玉齒又豈足信乎哉

秋八月遷戎于太原

箋按後漢西羌傳穆王西征犬戎
獲其五王遊遷戎于太原秦本紀

莊襄王二年使蒙驁攻趙定太原三年攻趙榆次新
城狼孟取三十七城四年王齮攻上黨初置太原郡
正義曰上黨以北皆太原地即上三十七城也然則
古太原地甚廣穆傳遷戎于太原夷王伐太原之戎
至俞泉宣王時伐獫狁至太原皆此地也後人疑太
原甚近又非必即戎程盤踞之所皆泥于杜預左傳
注太原即
晉陽耳

王北征行流沙千里積羽千里

箋按山海經大荒之中有大澤千里羣鳥

所解征犬戎取其五王以東西征于青鳥所解

附注三危山

箋按山海經三危之山三青鳥居之郭注引竹書曰穆王西征至青鳥所解也

西征還履天

下億有九萬里

箋按穆傳天子大朝于宗周之廟乃里西土之數曰自宗周至于西北大

曠原萬四千里乃還南復至于陽紆七千里還歸于周三十里各行兼數三萬有五千里安得如約說億有九萬里乎

十八年春正月王在祇宮諸侯來朝

箋按在一作居穆王元年築祇宮于

南鄭穆傳曰仲冬吉日丁酉天子入于南鄭又曰吉日丁亥天子入于南鄭蓋以南鄭有祇宮在也穆王

常居于祇宮故諸侯來朝亦就祇宮而朝也

二十四年王命左史戎夫作記

箋按周書曰穆王思保位為難恐貽世羞欲自

警悟作史記維正月王在成周昧爽召三公左史戎夫曰今夕朕寤遂事誓予乃取遂事之要戒俾戎夫言之朔望以間信不行義不立則哲士陵君政而生亂皮氏以亡謠諛日近方正日遠則邪人專國政禁而生亂華氏以亡好貨財珍怪則邪人進邪人進則賢良日蔽而遠賞罰無位隨財而行夏后氏以亡嚴兵而不仁者其臣憚其臣憚而不敢忠不敢忠則民不親其吏刑始于親遠者寒心殷商以亡樂專于君者權專于臣權專于臣則刑專于民君娛于樂臣爭于權民盡于刑有虞氏以亡奉孤以專命者謀主必畏其威而疑其前事挾德而責數日疏位均而爭平林以亡大臣有錮職誅者危昔日簡沙三卿朝而

無禮君起而久拘之譁而弗加諸卿謀變質沙以亡外內相間下撓其民民無所附三苗以亡弱小在强大之間存亡將由之則無天命矣不知命者死有夏之方興也扈氏弱而不恭身死國亡嬖子兩重者亡昔者義渠氏有兩子異母皆重君疾大臣分黨而爭義渠以亡功大不賞者危昔平州之功大而不賞謠臣日嘗貴功日怒而生變平州之君以走出召遠不親者危昔有林氏召離戎之君而朝之至而不禮留而勿親離戎逃而去之林氏誅之天下叛林氏昔者曲集之君伐智而專事強力而下賤其臣忠良皆伏愉州氏伐之君孤而無使曲集以亡昔者有巢氏有亂臣而責任之以國假之以權擅國而主斷君已而奪之臣怒而生變有巢以亡斧小不勝柯者亡昔有鄒之君嗇儉減爵損祿羣臣卑讓上下不臨後君小弱禁罰不行重氏伐之鄒君以亡久空重位者危昔有共工自賢自以無臣久空大官下官交亂民無所

附唐氏伐之共工以亡犯難爭攘疑者死昔有林氏
上衡氏爭權林氏再戰弗勝上衡氏偽義弗刻俱身
死國亡知能均而不親並重事君者危昔有南氏有
二臣貴寵力鈞勢敵競進爭權下爭朋黨君弗禁南
氏以分昔有果氏好以新易故故者疾怨新故不和
內爭朋黨陰事外權有果氏以亡爵重祿輕比則已
不成者亡昔有畢程氏捐祿增爵羣臣貌匱比而戾
民畢程氏以亡好變故易常者亡昔陽氏之君自伐
而好變事無故業官無定位民運于下陽氏以亡業
刑而復者危昔穀平之君復類無親破國弗剋業刑
用國外內相援穀平以亡武不止者亡昔阪泉氏用
兵無已謀戰不休并兼無親文無所立智士寒心徒
居至于獨虎諸侯叛之阪泉以亡恨而無親者亡昔
者縣宗之君恨而無聽執事不從宗職者疑發大事
羣臣解體國無立功縣宗以亡昔者玄都賢鬼道廢
人事天謀臣不用龜策是從神巫用國哲士在外玄

都以亡文武不行者亡昔西夏性仁非兵城郭不修
武士無位惠而好賞屈而無以賞唐氏伐之城郭不
守武士不用西夏以亡美女破國昔者續陽強力四
征重丘遺之美女續陽之君悅之熒惑不治大臣爭
權遠近不相聽國分為二宮室破國昔者有洛氏宮
室無常池園廣大工巧日進以後更前民不得休農
失其時饑饉無食成
湯伐之有洛以亡

三十五年荆人入徐

按羅泌曰自若木至偃王三十
二世為周所滅後封其子宗為徐

子按徐亡于穆王十四年至是僅二十一
年而荆人入徐正徐子宗結封之時也

毛伯遷帥師敗荆人于沛

按穆王十二年毛公班從
伐犬戎遷當是班之子又按

沛即濟衛
詩作沛

三十七年大起九師

箋按周禮大司馬凡制軍萬有二千五百人為軍二千五百人為

師則九師當二萬二千五百人大雅常武曰整我六師以修我戎文王曰周王于邁六師及之皆無過六師而已此則六師之外又益一半故曰大起九師也漢鄭氏以六師即六軍恐非

東至于九江

箋按康王十六年王南巡狩至九江廬山史記淮南王傳伍被曰結九江之浦絕豫

章之口正義曰即彭蠡湖口北流入大江者漢志曰廬山郡尋陽禹貢九江在南則九江不在洞庭明矣竹書云穆王大起九師東至于九江亦即是廬山尋陽之九江也

架鼃鼃以為梁

箋按初學記引紀年曰周穆王至于九江叱鼃鼃以為梁郭璞山海經序曰穆

王駕八駿之乘周歷四荒西燕王母之廬南標鼃鼃之梁離騷經虺蛟龍使梁津兮王逸注似周穆王之

越海叱鼉鼉以為梁也庾信徵調曲浮鼉則東海可
屬蓋謂此也又按魏畧曰北方有索離之國其王侍
婢云有氣如鷄子來下因有身生子東明善射王恐
奪其國欲殺之東明走南至菴水以弓擊水魚鼉浮
為橋得渡與後漢夫餘傳同但菴水作淹流水索離
作索離又隋書高麗傳曰朱蒙棄夫餘南走過一大
水深不可越於是魚鼉積而成橋遂
渡則穆王架鼉鼉為梁容或有之

遂伐越至于紆

箋按穆王伐越非必即禹後之越如史
記吳起列傳南平百越南越列傳使和

集百越其大起九師豈僅以禹後之一越哉伐至于
紆紆當為越之地名楚世家熊渠伐庸揚粵索隱曰
有本作揚雱音吁
地名也雱即紆矣

荆人來貢

箋按三十五年毛伯邊敗荆人
于泚故荆人畏伐而來貢也

三十九年王會諸侯于塗山

箋按昭四年傳椒舉曰穆有塗山之會杜注周穆王

會諸侯于塗山塗

山在壽春東北

四十五年魯侯潰薨

箋按魯世家潰殺幽公而自立是為魏公在位五十年卒漢志作弟

師古曰潰古沸字也

世本潰作弗魏作傲

五十一年作呂刑

箋按書叙曰呂命穆王訓夏贖刑作呂刑馬端臨曰呂刑一書蔡氏謂舜

典贖刑施于官府學校耳五刑未嘗贖也穆王贖及大辟益巡遊無度財匱民勞為此一切斂財之計夫子錄之蓋以示戒愚以為未然熟讀此書哀矜惻怛之意千載之下猶使人感動且拳拳乎富貨之戒則其不為斂財設也審矣鬻獄末世暴君汚吏之所為而謂穆王為之夫子取之乎且其所謂贖之意自有

在學者惟不詳考之耳其曰墨辟疑赦其罰百錢蓋謂犯墨法之中疑其可赦者不遽赦之而姑取其百錢以示罰耳繼之曰問實其罪蓋言罪之無疑則刑可疑則贖皆當問其實也其所謂疑者何也蓋唐虞之世刑法簡是以贖金之法止及鞭朴至于周而文繁俗弊矣五刑之屬至于三千若一按之法而刑之則舉足觸弇矣是以穆王哀之而五刑之疑各以贖論姑以大辟言之夫所犯至死而聽其贖金以免誠不可矣然大辟之贖二百豈無疑赦而在可贖之列者如漢世將帥出師失期之類于法皆死而贖為庶人亦其遺意也或曰罪疑則降等施刑可矣何必贖乎曰古之議疑罪者降等一法也罰贖亦一法也虞書罪疑惟輕此書上下比罪上刑適輕下服降等法也虞書金作贖刑此書五刑之贖罰贖法也固並行而不悖也又按徐鍇曰書金作贖刑古贖皆用銅漢始用黃金少其斤兩

命甫侯于豐

箋按孝經引書作甫刑孔氏書傳曰後為甫侯故稱甫刑正義曰傳稱後為甫侯者

以大雅嵩高之篇宣王之詩生甫及申揚之水為平王之詩不與我戎甫明子孫改封為甫侯今括竹書則穆王時命為甫侯矣一統志穆王時呂侯言于王徙下蔡作修刑辟命曰甫刑

五十五年王陟于祇宮

箋按昭十二年傳楚右尹子革曰昔穆王欲肆其心周行天下

將皆必有車輶馬跡馬祭公謀父作祈招之詩以諫王王是以獲沒于祇宮杜注祈父周司馬世掌甲兵之職招其名祭公方諫遊行故指司馬官而言梁蕭綺拾遺錄曰楚令尹子革有言曰昔穆王欲肆心周行使天下皆有車輶馬跡名山大川肆登躋之極殊鄉異俗莫不膜拜稽顙東升巨人之臺西寓王母之堂南渡龜鼉之梁北經積羽之地觴瑤池而賦詩期并伯而陸博勒石軒轅之丘紀述玄圖之上自開闢

以來載籍所紀未
有若此神異者也

共王

箋按周本紀穆王立五十年崩子共王繫扈立

名繫扈

箋按世本作伊扈

元年甲寅春正月王即位

四年王師滅密

箋按國語曰共王游于涇上密康公從有三女奔之其母曰必致之王夫女三

為粲粲美之物也衆以美物歸女而何德以堪之康公弗獻一年王滅密漢志安定陰密縣

九年春正月丁亥王使內史良錫毛伯遷命

箋按廣川書跋有毛

伯敷皇祐中長安民得于渭上其銘曰毛伯內門立中庭右祝邠王吁內史冊命邠王曰邠昔先王既命

汝作邑令唯亂商乃命錫令据竹書共王九年春使
內史良錫毛伯遷命古遷字小篆作𠄎劉原父以邾
為毛叔鄭董適以許慎顧野王書有邾字呂忱以邾
為周人名邾省作邾亦猶遷省作迂也竹書康王十
九年毛懿公堯穆王十二年有毛公班從伐犬戎三
十七年毛伯遷敗荆人于涕遷當是毛班子至是乃
錫命為
二伯也

十二年王陟

懿王

箋按周本紀共王
崩于懿王躋立

名堅

箋按史
記作躋

元年丙寅春正月王即位

天再旦于鄭

箋按石氏曰日再出為滲先其國有兵開元占經曰竹書懿王元年天再啓于鄭鄭

當是京兆鄭縣今西安府華州也在府城東二百里有古鄭城在城北一統志周時鄭桓公始封此其地亦名咸林或作械林字近而譌也又按吳淑天賦曰驚鄭國之再旦注引竹書紀年曰懿王元年天再旦于鄭括宣王二十二年始錫王子多父命其後為鄭桓公乃始為鄭國則再旦于鄭者京兆鄭縣也穆天子傳屢言王入于南鄭是也齊地記曰古者有日夜出于東萊故萊子立城以不夜為名又漢殤帝延平一年天一夕再啟亦是類也

七年西戎侵鎬

箋按詩六月侵鎬及方至于涇陽毛傳曰鎬也方也皆北方地名則此非鎬京

也一統志涇陽故城在平涼府界漢初屬安定郡

十三年翟人侵岐

箋按左傳唐桓伯曰魏駘芮畢岐吾西土也漢匈奴傳曰懿王時王室遂

衰戎狄交侵暴

虐中國是也

十五年王自宗周遷于槐里

箋按宗周鎬京也宋衷曰懿王自鎬徙都犬丘水經

注曰渭水又東逕槐里縣故城南縣故犬丘邑也周赧王都之秦以為廢丘漢高祖三年改曰槐里今据竹書舊名槐里矣周既自鎬京遷此豈有天子之所都而不改犬丘之名乎又鄭注赧王當作懿王括地志犬丘故城一名廢丘在雍州始平縣東南十里即周懿王所都地理通釋秦紀非子居犬丘周孝王分土為附庸邑之秦莊公居其故西犬丘即此也

十七年魯厲公擢薨

箋按魯世家魏公卒子厲公擢立厲公三十七年卒魯人立其弟具

是為獻公擢
世本作程

二十一年虢公帥師北伐犬戎敗逋

莧按漢匈奴傳曰
懿王時戎狄交侵

詩人疾而歌之曰靡室靡家玁狁之故豈不日戒玁狁孔急當是見有戎難重歌采薇之詩耳不然采薇小雅之正豈始于懿哉

二十五年王陟

懿王之時興居無節號令不時挈壺氏不能共其職

諸侯於是攜德

莧按周禮挈壺氏掌縣壺以水火守之分以日夜注曰縣壺以為漏分以日夜

者異晝夜漏也又按齊風序東方未明刺無節也朝廷興居無節號令不時挈壺氏不能掌其職焉沈氏

附注
本此

孝王

箋按周本紀懿王崩共
王弟辟方立是為孝王

名辟方

元年辛卯春正月王即位

命申侯伐西戎

箋按秦本紀申侯言于孝王曰昔我先
鄭山之女為戎胥軒妻生仲湏以親故

歸周保西垂西垂以其故和睦則
孝王以伐西戎命申侯者此也

五年西戎來獻馬

箋按西戎獻馬馬漸蕃而非
子以牧馬起其禍實始于此

七年冬大雨電江漢水

附注江漢水
是年鴈王生

八年初牧馬于汧渭

箋按秦本紀非子居犬丘人言之周孝王孝
畜善養之犬丘

王召使主馬于汧渭之間馬大蕃息孝王于是分土
為附庸邑之秦又按地理志扶風汧縣吳山在西方
文以為汧山雍州山北有蒲谷鄉
中谷雍州強蒲藪汧水出西北入渭

九年王陟

夷王

箋按周本紀孝王崩諸侯復
立懿王太子變是為夷王

名變

元年庚子春正月王即位

箋按郊特牲云覲禮天子不
下堂而見諸侯至夷王為諸

侯所共立因加禮馬于是
始下堂見諸侯覲禮廢

二年蜀人呂人來獻瓊玉

箋按周禮玉人共王之服玉佩玉珠玉內府掌受九貢九

賦九功之貨賄凡四方之幣獻之金玉齒革良貨賄入焉鄭注諸侯朝聘所獻國珍也逸論語曰瓊赤玉也說文亦以為赤玉据齊風著詩尚之以瓊華乎而鄭箋曰人君以玉為瓊華正義曰瓊是玉之美名華謂色有光華

賓于河用介圭

箋按夏帝芒元年以玄珪賓于河是古有是禮也介圭大圭也尺有二寸曰介

圭

三年王致諸侯烹齊哀公于鼎

箋按齊世家癸公卒子哀公不辰立哀公時紀

侯諧之周周烹哀公徐廣曰周夷王宋衷曰哀公荒淫田遊史作還詩以刺之也又哀公不辰世本作不

臣周本紀正義引紀年云夷王三年致諸侯翦齊哀公昂與今本異

六年王獵于社林獲犀牛一以歸

箋按郭璞曰犀形似牛豬頭大腹痺脚黑

色三角一在項上一在額上一在鼻上鼻上者即食角也亦有一角者李東璧曰犀凡三種山犀水犀有鼻額二角兕犀止有一角在頂郭云三角傳記也又按魯世家厲公擢卒獻公具立獻公三十二年卒是當卒于是年紀年不載闕文也

七年虢公帥師伐太原之戎至于俞泉獲馬千匹

箋按後漢

西羌傳亦引至于俞泉獲馬千匹通鑿注俞泉地名在太原府城西北

冬雨雪大如礪

箋按京房曰凡雪過大人君惡聞其過也

楚子熊渠伐庸至于鄂

箋按楚世家當周夷王之時王室微諸侯或不朝相伐熊渠甚

得江漢間民和乃興兵伐庸揚粵至于鄂杜預曰庸今上庸縣劉伯莊曰鄂地名在楚之西一統志鄂王

城在武昌縣西南二里即楚熊渠之子封國城也

廣川書跋曰春秋時楚本熊穴後世以熊為號

八年王有疾諸侯祈于山川

箋按左傳曰至于夷王王愆于厥躬諸侯莫不奔走

期望以祈王身杜預春秋釋例曰古人有祭事無祈禱禳禱則有之今據夷王八年王有疾諸侯祈于山川則是祈禱之事自夷王始也又按書金縢曰以旦代某之身周禮甸師職喪事代王受災青魏鶴山曰代王受災青乃是災禍之來欲代王受之即令人不自須滅之義

王陟

厲王

箋按周本紀夷王崩子厲王胡立

名胡

附注居雍有汾水焉故又曰汾王

元年戊申春正月王即位

作夷宮命卿士榮夷公落

箋按夷宮厲王所作奉父夷王之宮周語厲王說榮夷公

芮良夫曰夫榮公好專利而不知大難榮公若用周必敗既榮公為卿士諸侯不享又按爾雅曰落始也

鄭氏詩箋曰歌斯干之詩以落之是也

楚人來獻龜貝

箋按易曰十朋之龜大寶也蘇林曰兩貝為朋漢書食貨志元龜距冉長尺二

寸直二千一百六十為大貝十朋公龜九寸直五百為壯貝十朋侯龜七寸以上直三百為幺貝十朋子

龜五寸以上直百為小貝十朋是也楚世家當夷王之時熊渠甚得江漢間民和乃立其三子為王皆在江上楚蠻之地及厲王之時暴虐熊渠畏其伐楚亦去其王則此來獻龜貝者蓋即是熊渠也

三年淮夷侵洛王命虢公長父伐之不克

箋按洛即洛邑也呂氏春

秋曰厲王染于虢公長父榮夷終高誘曰虢榮厲王二卿士又按虢一作郭荀子成相篇孰公長父之難厲王流于虢楊倞注孰或為郭又按高誘國策注郭古虢字也

齊獻公山薨

箋按齊世家周烹哀公而立其弟靜是為胡公當夷王之時哀公之同母少弟乃與

其黨帥營丘人襲攻殺胡公而自立是為獻公九年牛子武公壽立

六年楚子延卒

箋按楚世家熊渠卒子熊摯紅立摯紅牛其弟弒而代立曰熊延譙周古史考

云熊渠卒子熊翔立卒長子摯有疾少于熊延立宋均注樂緯云熊渠嫡嗣曰熊摯有惡疾不得為後別居于夔似熊延無弒兄而代立之事疑史誤也

八年初監謗

箋按周語曰厲王虐國人謗王召公告王曰民不堪命矣王怒得衛巫使監謗者以

告則殺之國人莫敢言道路以目王喜告召公曰吾能弭謗矣乃不敢言

為伯良夫戒百官于朝

箋按周書曰為伯稽古作訓納王于善暨執政小臣咸省厥躬

作為良夫解曰今爾執政小子惟以貪諛為事不勤德以備難下民胥怨財單竭手足靡措弗堪戴上不其亂而以予小臣良夫觀天下有土之君厥德不遠罔有代德時為王之志斯惟國人嗚呼惟爾執政朋友小子其惟改爾心改爾行克憂往愆以保爾居地理志平翊臨晉有為鄉故為國左傳貽為罪岐吾西

土當卽是芮伯之故封也又按一統志處州宣平縣西十五里有三真君祠周厲王時三諫臣唐宏葛雍周武以屢諫不用遠遊于此姑存以備考

十一年西戎入于犬丘

箋按秦本紀周厲王無道諸侯或叛之西戎反王室滅大駱犬

丘之族

十二年王亡奔彘

箋按昭二十六年傳至于厲王王心戾虐萬民弗忍居王于彘韋昭曰彘

晉地漢為縣屬河東郡今曰永安

國人圍王宮執召穆公之子殺之

箋按左傳服虔注召穆公召康公十六世

孫周本紀厲王太子靜匿召公家國人聞之乃圍之召公乃以其子代王太子太子竟得脫一統志鳳翔

縣春秋時為故雍
本召穆公之采邑

十三年王在彘共伯和攝行天子事

附注號曰共和
按魯連子曰衛

州共城縣本周共伯之國也共伯名和好行仁義諸侯賢之周厲王無道國人作難王奔于彘諸侯奉和以行天子事號曰共和史遷以為周召二公行政號共和非實錄也又按徐廣曰自共和元年歲在庚申訖敬王四十九年凡三百六十五年共和在春秋前一百一十九年劉恕作資治通鑿外紀起共和庚申至威烈王二十二年丁丑四百三十八年今據竹書厲王元年戊申則十三年為共和元在庚申

十四年玁狁侵宗周西鄙

按稽古錄以是年為共和元年漢霍去病傳注服虔曰

玁狁允堯時曰熏鬻周曰玁狁秦曰匈奴宗周鎬京也

召穆公帥師追荆蠻至于洛

箋按詩序曰瞻彼洛矣刺幽王也其詩曰瞻彼洛矣

維水泱泱君子至止福祿如茨棘韜有爽以作六師毛傳曰棘韜所以代輶也天子六軍疑當日召公帥

師至洛國人美之而作是詩蓋當為厲王時詩洛亦是東都之洛孔疏以洛為漆沮非是竹書幽王六年

王命伯士帥師伐六濟之戎王師敗逋尚且書之何得有帥師追荆蠻至洛而紀年于幽王時不一書乎

十六年蔡武侯薨

箋按蔡世家武侯時厲王失國武侯卒子夷侯立

楚子勇卒

箋按楚世家熊勇六年厲王出奔羸熊勇十年卒

十九年曹夷伯薨

箋按曹世家夷伯喜立二十三年厲王奔羸三十年卒

二十一年大旱

箋按春秋僖公二十一年夏大旱杜氏曰雩不獲雨故書旱自夏及秋五稼皆

不救是以五穀
不收為大旱也

陳幽公薨

箋按陳世家幽公寧十二年
厲王奔虢二十三年幽公卒

二十三年大旱

宋僖公薨

箋按宋世家釐公舉十七年
厲王奔虢二十八年釐公卒

二十四年大旱

杞武公卒

箋按杞世家杞謀娶公當周厲王時生武公
武公立四十七年卒令梧竹書武公薨厲王

二十四年安得其父當厲
王時乃生武公乎史誤

二十五年大旱

楚子嚴卒

箋按楚世家熊勇卒弟熊嚴為後十年卒据竹書當是七年史誤

二十六年大旱

箋按詩序曰雨無正大夫刺幽王也鄭箋曰當為刺厲王詩宗周既滅靡所止

戾宗周鎬京也王流于羸無所安定也今据竹書厲王流羸以後二十二年至二十六年歲皆大旱故其詩曰降喪饑饉斬伐四國又曰戎成不退饑成不遂正大夫作雨無之詩以刺之正厲王游旱時也子貢詩傳曰王室播遷大夫誓御之臣賦雨無其極申培詩說曰雨無其極大夫有不忠于王室者誓御之臣閔之而作劉元成曰嘗讀韓詩有雨無極篇凡毛詩篇首多雨無其極傷我稼穡八字則正厲王居羸連年大旱時詩也若幽王即位日食日暈震電閉霜一書之豈連年大旱而不書乎鄭箋以為刺厲王是也

王陟于羸

箋按厲王居羸十五年

周定公召穆公立太子靖為王

箋按周本紀共和十四年王死于羸太子靜長

于召公家二相乃共立之為王是為宣王

共伯和歸其國

箋按呂氏春秋慎人篇許由虞乎潁陽共伯得乎共首高誘曰共國伯爵也棄

其國隱于共首山而得其志也不知出何書也時竹書未出故誘亦不知也

遂大雨

大旱既久廬舍俱焚會汾王崩

箋按厲王居羸羸有汾水故亦稱汾王詩

韓侯娶妻汾王之甥是也

卜于太陽兆曰厲王為崇周公召公乃

立太子靖共和遂歸國和有至德尊之不喜廢之不

怒道遙得意于共山之首

箋按莊子子貢曰古之得道者窮亦樂通亦樂所樂

非窮通也故許由娛于潁陽而共伯得乎共首司馬彪注曰共伯名和修則雙名也

竹書統箋卷八

欽定四庫全書

竹書統箋卷九

翰林院檢討徐文靖撰

宣王

箋按周本紀厲王死于彘宣王即位

名靖

元年甲戌春正月王即位周定公召穆公輔政

箋按周本紀宣

王即位二相輔之修政法文武成康之遺風諸侯復宗周僖公二十四年傳注曰召穆公周卿士名虎扶

風雍縣東

南有召亭

復田賦

箋按周禮大司馬凡令賦以地與民制之上地食者參之二其民可用者家三人中地食者半

其民可用者二家五人下地食者參之一其民可用者家二人令邦國之賦亦以地之美惡民之衆寡為制鄭司農曰上地謂肥美田也注曰賦給軍用者也周自厲王奔虜田賦廢弛宣王即位而復之

作戎車

箋按小雅戎車既飭鄭箋曰戎車革輅之等也其等有五孔疏曰春官掌王之五路革路以即

戎故知戎車革路之等也漢志天子畿方千里提封百萬井定出賦三十四萬井戎車四萬匹兵車萬乘王明齋曰以王畿千里居民之數計之為田一千六百同每同除山澤邑居溝渠道路等三分之一為六千四百井每井以上中下三等一易再易計之一夫耕二夫之地實止四家以可任者三人至二人計之一每井十人故每同二萬五千餘家可任者六萬四千人出車百乘徒萬人每五家而出二人可任者六人

而用其一也是千里之地合有
四十萬家為車十六萬乘矣

燕惠侯薨

箋按燕世家厲王在薨十五年
燕惠侯卒竹書在宣王元年

二年錫太師皇父司馬休父命

箋按詩序曰白駒刺宣
王也箋曰刺其不能留

賢也其詩曰爾公爾侯逸豫無期正以命太師尹氏
皇父為三公故賢者欲去之也楚語重黎氏世叙天
地程伯休父其後也當宣王時失其官守而為司馬
氏韋昭曰謂失天地之官而以諸侯為大司馬郡國
志河南洛陽有上程聚古程伯休父之國也關中更
有程地帝王世記曰文王居程徙都豐故此加為上
程

魯慎公薨

箋按慎史記作真魯世家獻公三十二年卒
于真公溝立真公十四年厲王奔虢二十九年

年宣王即位三十年
真公卒子武公教立

曹公子蘇弑其君幽伯疆

箋按曹世家幽伯疆九年弟蘇殺幽伯代立是為戴伯戴

伯元年周宣
王立己三年

三年王命大夫仲伐西戎

箋按宣王時秦仲為西垂大夫水經注秦水出大隴山秦

谷歷三泉合成一水而歷秦川有秦亭秦仲所封也鄭語史伯曰秦仲齊侯姜嬴之雋也且大其將興乎韋昭曰秦仲嬴姓附庸秦公伯之子詩序曰車轄美秦仲大有車馬其詩曰有車轄轄有馬白顛小戎美襄公備兵甲討西戎其詩曰小戎伐收五綦良翰王氏維補曰秦仲誅西戎即小戎之詩是也朱子乃厲之襄公誤矣

齊武公壽薨

箋按齊世家武公壽九年厲王奔虢二十四年宣王立二十六年武公卒

四年王命蹶父如韓韓侯來朝

箋按左傳曰韓武之穆也詩序曰韓奕美宣王

也能錫命諸侯其詩曰蹶父孔武靡國不到為韓侯相彼莫如韓樂蹶父如韓之事也詩又曰韓侯入覲以其介圭入覲于王韓侯來朝之事也

五年夏六月尹吉甫帥師伐玁狁至于太原

箋按詩序曰六月宣

王北伐也其詩曰薄伐玁狁至于太原文武吉甫萬邦為憲漢書陳湯傳劉向上疏曰吉甫之歸周厚賜之是其事也又按太原即涇陽後魏於此置原州非左傳杜注所謂太原即晉陽也一統志尹吉甫宅在鄆陽府房縣城南門外

秋八月方叔帥師伐荆蠻

箋按詩序曰采芑宣王南征也其詩曰蠢爾蠻荆大邦為

讎方叔元老克壯其猶是其事也

六年召穆公帥師伐淮夷

箋按詩序曰江漢尹吉甫美宣王也能興袞撥亂命召公

平淮夷其詩曰淮夷來鋪王命召虎是其事也僖公二十四年傳召穆公思周德之不類杜注召采地扶

風雍縣東南有召亭

王帥師伐徐戎

箋按詩序曰常武召穆公美宣王也其詩曰南仲太祖太師皇父整我六師以

修我戎又曰王謂尹氏命程伯休父率彼淮浦省此徐土是其事也

皇父休父從王伐徐戎次于淮

箋按詩鐘鼓序曰刺幽王也歐陽永叔謂詩書

史記皆無幽王東巡之事又自成王時淮夷不為周臣宣王時遣將征之亦不自往幽王何得作樂于淮上然則詩所云鐘鼓淮上果屬何代之王也今括竹書宣王六年王帥師伐徐戎虜父休父從王次于淮則作樂于淮上者蓋宣王也
歐公謂宣王未嘗至淮非也

王歸自伐徐錫召穆公命

箋按常武之詩曰徐方不回王曰旋歸是王歸自伐徐之

事也江漢之詩曰王命召虎來旬來宣文武受命召公維翰是其錫命之事也

西戎殺秦仲

箋按秦本紀秦仲立二十三年死于戎有子五人其長者曰莊公宣王乃召莊公昆

弟五人與兵七千使伐西戎破之於是復予秦仲後及其先大駱大邱并有之為西垂大夫

楚子霜卒

箋按楚世家熊霜元年周宣王初立熊霜六年卒

七年王錫申伯命

箋按詩序崧高尹吉甫美宣王也天下復平能建國親諸侯褒賞申伯焉

其詩曰王命申伯式是南邦因是謝人以作爾庸是其事也韋昭曰謝中伯之都令在南陽潛夫論曰申

在宛北序山之下
路史曰序即謝也

王命樊侯仲山甫城齊

箋按詩序烝民尹吉甫美宣王也其詩曰王命仲山甫城彼東

方毛傳曰樊穆仲也東方齊也古者諸侯之居逼隘則王者遷邑而定其居蓋去薄姑而遷于臨淄也孔疏曰以為宣王之時始遷臨淄齊世家周夷王之時哀公之同母少弟山殺胡公而立是為獻公因徙薄姑都治臨淄史記之文事多疏畧又按晉語倉葛曰陽人有樊仲之官守服虔曰陽城樊仲山甫所居故名陽樊韋昭曰仲山甫王卿士食采于樊朱子詩集傳曰仲山甫樊侯之字也杜預曰野王西南有樊城

路史曰陽樊在濟源縣東南三十八里其後出為樊侯而城齊故宛有樊城也括地志漢樊縣城在兗州瑕丘縣西南三十五里當是仲山甫城齊時所築也今据竹書獻公在位九年卒當周厲王之六年子武公立宣王四年卒子厲公立是山甫城齊當齊厲公之三年不得云獻公

八年初考室

箋按詩序斯干宣王考室也鄭箋曰考成也宣王築宮廟羣寢既成而饗之歌斯干

之詩以落之此之謂成室儀禮下管新宮笙入三成蓋即此詩也

魯武公來朝錫魯世子戲命

箋按周語魯武公以括與戲見王王立戲樊仲山甫

諫曰不可立也夫下事上少事長所以為順也今天子立諸侯而建其少是教逆也若魯從之而諸侯效之王命將有所墜若不從而誅之是自誅王命也是事也誅亦失不誅亦失天子其圖之王卒立之

九年王會諸侯于東都遂狩于甫

箋按詩序車攻宣王復古也宣王能內修

政事外攘夷狄復文武之竟土脩車馬備器械復會諸侯于東都因田獵而選車徒馬其詩曰四牡龐龐駕言徂東又曰東有圃草駕言行狩是其事也鄭箋曰東鄙王城也圃草圃田之草也鄭有圃田孔疏曰宣王之時未有鄭國圃田在東都畿內故宣王得往田焉今按穆傳曰庚午天子飲于甫上乃遣祭父如圃鄭用致諸侯丁丑天子里圃田之路東至于房西至于圃邱則是宣王前已先名圃鄭矣

十二年魯武公薨

箋按漢律歷志武公教即位二年春懿公被立史記魯世家武公九年春

與長子括少子戲西朝周宣王夏武公歸而卒今据竹書武公朝周在宣王八年卒于宣王十二年史記及漢志皆誤

齊人弑其君厲公無忌立公子赤

箋按齊世家厲公暴虐故胡公子復入齊

齊人欲立之乃與攻殺厲公胡公子亦戰死齊人乃立厲公子赤為君而誅殺厲公者七十人按年表宣

王十三年為齊

文公赤元年

十五年衛釐侯薨

箋按衛世家釐侯二十八年周宣王立四十二年釐侯卒

王錫號文公命

箋按賈侍中曰文公文王母弟號仲之後為王卿士韋昭曰號叔之後西號也

宣王都鎬在畿內括地志號故城在岐州陳倉縣東南十里

十六年晉遷于絳

箋按史記周成王封弟叔虞于唐詩唐風譜曰太原晉陽是也唐叔子燮

改為晉侯燮曾孫成侯南徙曲沃近平陽其孫穆侯又徙于絳云按漢志河東絳縣晉武公自曲沃徙此

應劭曰絳水出西南今據晉世家穆侯費王立上距宣王之立十五年穆侯遷絳與紀年合是漢志誤也

十八年蔡夷侯薨

箋按蔡世家夷侯十一年周宣王即位二十八年夷侯卒

二十一年魯公子伯御弑其君懿公戲

箋按國語魯武公以括與戲見

王韋昭曰括武公長子伯御也戲括弟懿公也宋庠曰今考魯世家宣王立戲為魯太子戲立是為懿公九年懿公兄括之子伯御與魯人攻弑懿公而自立則伯御乃括之子明矣又按班固人物表伯御懿公元子與史記合今以括為伯御疑失之漢律志懿公九年正月癸巳朔旦冬至殷歷以為甲午蓋即是年也

二十二年王錫王子多父命居洛

箋按左傳隱八年鄭伯請釋秦山之祀而

祀周公以泰山之祊易許田杜注曰鄭桓公周宣王之母弟封鄭助祭泰山湯沐之邑在祊此以厲王之子宣王之弟故稱王子多父即鄭桓公友也世本鄭桓公居棧林徙拾左傳襄十四年鄭子矯帥師至于棧林杜注棧林秦地是桓公初封京北鄭縣後乃命之居洛也水經注曰竹書紀年晉文侯二年同王子多父伐郟克之乃居鄭父之丘名之曰鄭是曰桓公皇甫士安曰或言鄭故有熊氏之墟黃帝之所都也鄭氏徙居之故曰新鄭是新鄭之名亦始于桓公竹書云王命居洛是矣注又曰渭水又東石橋水出馬嶺山北逕鄭城西東去鄭城十里而北流注于渭闕駟謂之新鄭水蓋以桓公居洛為新鄭故以石橋水在鄭縣者亦謂之新鄭水也世本言宣王二十二年封庶弟友于鄭竹書言宣王二十二年錫王子多父命居洛是多父即友友時居洛已有新鄭之名其子武公襲封亦稱新鄭非武公遷洛乃稱新也古友字

作爰與多字相近或稱友也薛瓚言穆王已下都于西鄭不得以封桓公者非是

二十四年齊文公赤薨

箋按齊世家文公十二年卒子成公脱立

二十五年大旱王禱于郊廟遂雨

箋按詩序曰雲漢仍叔美宣王也宣王承

厲王之烈內有撥亂之志遇災而懼其詩曰旱既太甚蘊隆蟲蟲不殄禋祀自郊徂宮上下奠瘞靡神不宗是其禱于郊廟之事也皇甫謐曰宣王元年不藉千畝虢公諫不聽天下大旱三年不雨至六年乃雨今据竹書大旱在宣王二十五年不藉千畝在二十九年亦併無藉早五年之事謚說非也

二十七年宋惠公覲薨

箋按宋世家惠公四年周宣王即位三十年惠公卒

二十八年楚子狗卒

箋按楚世家熊狗十六年鄭桓公初封于鄭二十二年卒

二十九年初不藉千畝

箋按周語曰宣王即位不藉千畝號文公諫曰不可夫民之大

事在農古者大史順時視土農祥農正先時九日太史告稷曰自今至于初吉陽氣俱烝上膏其動卒以告王乃使司徒咸戒公卿百吏庶民司空除壇於藉命農大夫咸戒農用及藉后稷監之膳夫農正陳藉禮太史贊王王敬從之王耕一璜班三之庶人終於千畝今天子欲修先王之緒而棄其大功匱神之祀而困民之財將何以求福用民王弗聽

三十年有兔舞于鎬京

箋按周禮服不氏掌養猛獸而教擾之注曰猛獸虎豹熊羆之

屬擾馴也列子曰周宣王之牧正有梁鴛者能養野禽獸使毛丘園傳之鴛曰且一言我養虎之法順之則喜逆之則怒汲冢瑣語曰幽王欲殺太子宜臼釋虎使執之宜臼叱之虎輒弭耳而服是周宣王養猛

獸而幽王又尤而效之也免舞錫京豈亦有教之使
舞者耶京房占曰免止城上邑必虛初學記引紀年
曰宣王三十年有兔舞錫京漢五行志曰昭帝元鳳
元年九月有黃鼠銜其尾舞王宮端門中亦是類矣
三十二年王師伐魯殺伯御箋按周本紀伯御即位十

伯御

命孝公稱于夷宮

箋按宣王既殺伯御而問魯公子能
道順諸侯者以為魯後樊穆仲曰魯

懿公弟稱肅恭明神敬事者老賦事行刑必問于道
訓而咨于故實宣王曰然乃立稱于夷宮韋昭曰夷
宮者宣王祖父夷王之廟古者爵命必于祖廟又按
唐孔氏詩正義曰宣王三十年伐魯諸侯從此而不
睦蓋周衰至此而漸也大局宣王之美詩多在三十
年前事歲規之篇當在三十年之後王德漸衰美刺

並作其大雅六篇小雅自正月至鴻鴈及斯干無羊
七篇皆宣王德盛時作自庭燎盡我行其野是王德
衰乃作以前諸侯不睦各不朝宗沔水之詩或亦作
也後則王政大衰刺詩為常故宜多也据竹書則伐

魯在宣王三十二年
詩疏少二年也

陳僖公孝薨

箋按陳世家釐公孝六年周宣王即位三十六年釐公卒

有馬化為人

箋按京房曰天子諸侯相伐民流百姓勞厥妖馬生人令馬之化人亦猶是也

三十三年齊成公薨

箋按齊世家成公脫立九年于莊公購立脫世本作說

王師伐太原之戎不克

箋按穆王十七年遷戎于太原故太原之戎日盛朱長孺曰詩

薄伐獯狁至于太原後漢西羌傳夷王命虢公帥六師伐太原之戎至于俞泉宣王二十六年遣兵伐太

原之戎不克諸所稱太原非禹貢之太原也後漢靈帝紀段熲破先零羌于涇注涇陽屬安定郡在原州郡縣志原州平涼縣本漢涇陽縣地然則太原當即今之平涼而後魏立為原州亦是取古太原之名爾計周人之禦獫狁必在涇原之間若晉陽之太原在大河之東距周京千五百里豈有寇從西來兵乃東出者乎長孺之言正非無見今竹書云厲王十四年獫狁侵宗周西鄙則詩云薄伐獫狁至于太原其不得在東明矣况獫狁侵鎬及方至于涇陽詩人已明言之矣詩又言豎居焦獲括地志焦獲亦名剗口在雍州涇陽縣城北十數里則太原亦指涇陽從可知矣

三十七年有馬化為狐

箋按唐開元占經引紀年曰周宣王三十三年有馬化為狐今

按是三

十七年

燕僖侯卒

箋按燕世家釐侯宣王初即位三十六年釐侯卒

楚子鄂卒

箋按楚世家熊鄂立九年卒索隱曰鄂一作噩

三十八年王師及晉穆侯伐條戎奔戎王師敗逋

箋按桓二

年左傳條之役杜注條晉地史記晉世家穆侯費王立七年伐條即是條也九域志條縣在冀州東北一百五十里樂史云即有條國也按穆傳曰有虎在予葭中七萃之士高奔戎乃生捕虎而獻之又曰天子賜奔戎佩玉一隻奔戎再拜詣首或奔戎來服于周故仍以奔戎條之是時王師敗逋不言敗之者猶春秋曰王師敗績于茅戎以自敗為文尊尊之意也

三十九年王師伐姜戎戰于千畝王師敗逋

箋按周語曰宣王三

十九年戰于千畝王師敗績于姜氏之戎韋昭曰姜氏之戎西夷別種四嶽之後也詩序曰祈父剝宣王也其詩曰予王之爪牙胡轉予于恤靡所止居鄭箋曰謂見使從軍與姜戎戰于千畝而敗之時也郡國志太原界休縣有千畝聚左傳曰晉有千畝之戰在縣南日知錄曰穆侯時晉境不得至界按史記趙世家周宣王伐戎及千畝戰正義曰括地志千畝原在晉州岳陽縣北九十里是也又按晉世家穆侯十年伐千畝有功時亦惟王師敗御奄父脫王

四十年料民于太原

箋按周語曰宣王既喪南國之師乃料民于太原仲山甫諫曰民不

可料也不謂其少而大料之是示少而惡事也臨政示少諸侯避之治民惡事無以賦令且無故而料民天之所惡也王卒料之又按春秋傳子產對叔向曰宣汾洮障大澤以處太原晉荀吳帥師敗狄于太原

穀梁傳曰中國曰太原夷狄曰大鹵此太原在平陽東北也

戎人滅姜邑

箋按後漢西羌傳戎人滅姜侯之邑水經注曰岐水逕岐山而又屈逕周城南又東

逕姜氏城南為姜水一統志姜氏城在鳳翔府寶岐縣西南七里杜預左傳注姜戎姜姓之戎居晉南鄙

殆戎人滅姜之後姜遷晉南鄙也

晉人敗北戎于汾隰

箋按後漢西羌傳晉人敗北戎于汾隰注曰二水名非也左傳桓三

年曲沃武公逐翼侯于汾隰林唐翁曰曲沃武公逐翼侯于汾水邊也下濕曰隰

四十一年王師敗于申

箋按後漢西羌傳宣王四十年王師征申戎破之與此云敗

于申者不同

四十三年王殺大夫杜伯

箋按顏介寃魂志引周春秋曰周杜國之伯名恒為宣王

大夫宣王之妾曰女鳩欲通之杜伯不可女鳩訴之于王曰恒竊與妾交宣王信之囚杜伯于焦友左儒爭之王不許曰女別君而異友也儒曰君道友逆則順君以誅友友道君逆則師友以違君王怒曰易而言則生不易則死儒曰士不枉義以從死不易言以求生臣能明君之過以正杜伯之無罪九諫而王不聽王使薛甫司工錡殺杜伯左儒死之杜伯既死即為人見王曰恒之罪何哉召祝而以杜伯語告之祝曰始殺杜伯誰與王謀之王曰司工錡也祝曰何不殺錡以謝之宣王乃殺錡使祝以謝杜伯錡又為人而至曰臣何罪之有宣王告皇甫曰祝也與我謀而殺人吾所殺者又皆為人而見奈何皇甫曰殺祝以兼謝焉又無益也皆為人而至祝亦曰我焉知之奈何以為罪而殺臣也後三年遊于圃田從人滿野杜

伯乘白馬素衣司工錡為左祝為右朱衣朱冠起于道左執朱弓朱矢射王中心折脊伏于弓矢而死

其子隰叔奔晉

箋按左傳襄二十四年宣子曰昔勾之祖在周為唐杜氏杜預曰杜伯之子隰

叔奔晉四世及士會食邑于范為范氏括地志下杜故城在雍州長安縣東南九里古杜伯國

晉穆侯費生薨

箋按晉世家晉釐侯十四年周宣王初立十八年釐侯卒子獻侯籍立十年卒

子穆侯費王立二十七年卒索隱曰鄒誕生本作弗生或作潰生今依紀年作費生

弟殤叔自立世子仇出奔

箋按晉世家穆侯四年娶齊女姜氏為夫人七年伐條生

太子仇十年伐千畝有功生少子成師二十七年穆侯卒弟殤叔自立太子仇出奔

四十四年

箋按晉殤叔元年丁巳

四十六年王陟

箋按周語云杜伯射王于錫韋昭注錫錫京也周春秋謂杜伯射王于圃田與

國語

異

幽王

箋按周本紀宣王崩子幽王宮涅立

名涅

元年庚申春正月王即位

晉世子仇歸于晉殺殤叔晉人立仇是為文侯

箋按晉世家殤

叔四年穆侯太子仇率其徒襲殤叔而立是為文侯

王錫太師尹氏皇父命

箋按詩序曰節南山家父刺幽王也其詩曰赫赫師尹毛傳師

太師周之三公也尹氏為太師則詩正作于是時宣
王二年錫太師皇父至是尚在而幽王申錫之也

二年

箋按辛酉晉
文侯元年

涇渭洛竭

箋按周語曰幽王三年西周三川皆震伯陽
父曰昔伊洛竭而夏亡河竭而商亡今周德

若二代之季矣是歲也三川竭岐山崩韋昭曰三川
涇渭汭今据竹書乃涇渭洛也洛漆沮水也漢志曰
涇水出安定涇陽縣筭頭山東南至馮翊陽陵縣入
渭行千六十里渭水出隴西首陽縣西南鳥鼠同穴
山東至船司空入河行千八百七十里水經注按尚
書禹貢太史公烏本紀云導渭水東北至涇又東逕
漆沮孔安國曰漆沮一名矣一曰洛水也山海經白
於之山洛水出于其陽而東流注于渭漢書匈奴傳
武王放逐戎夷涇洛之北注云洛即漆沮水也出上
郡雕陰秦冒山東南入于渭周禮雍州之浸曰渭洛

殷本紀西伯獻洛西之地于紂正義曰洛水一名漆沮水在同州是涇渭洛為三川韋昭以為涇渭汭非也

岐山崩

箋按地理志扶風美陽縣岐山在西北郭璞曰漆水出岐山地理通釋岐山亦曰天柱山一統

志岐山在鳳翔府岐山縣北一十里

初增賦

箋按周禮太宰之職以九賦斂財賄一曰邦中之賦二曰四郊之賦三曰郊甸之賦四曰家削

之賦五曰邦縣之賦六曰邦都之賦七曰關市之賦八曰山澤之賦九曰幣餘之賦至是而悉增之不但田賦也故直曰增賦詩序曰楚茨刺幽王也政煩賦重田萊多荒序又曰甫田刺幽王也鄭箋曰政煩賦重農人失職是其事也

晉文侯同王子多父伐郟克之乃居鄭父之丘是為鄭

桓公

箋按鄭語桓公問於史伯曰王室多故余懼近焉其何所以逃死史伯對曰其濟河洛潁之間乎

是其子男之國虢郟為大君若以周難之故寄孥與賄焉不敢不許周亂而弊是驕而俞必將背君君若以成周之衆奉辭伐罪無不克矣若克二邑郟蔽補丹依味歷莘君之土也公說乃東寄帑與賄虢郟受之十邑皆有寄地韋昭曰後桓公之子武公竟取十邑而居之今河南新鄭是也据竹書桓公時已克郟而居于鄭父之丘故曰鄭桓公史記鄭世家桓公卒平王東徙其民雄東而虢郟果獻十邑竟國之與紀年合韋昭注國語其時未見竹書故以取十邑為武公也又按周彝器有史伯碩父鼎銘曰維六年八月初吉己子史伯碩父追孝于朕皇考釐仲王母乳母尊鼎黃伯思東觀餘論曰史伯周宣王臣碩父其字

也

三年王嬖褒姒

箋按後漢注無德而寵曰嬖稽古錄幽王三年王得褒姒嬖之詩人知其必亡

刺之曰赫赫宗周褒姒滅之毛傳曰昔夏之衰有二龍之妖卜藏其策周厲王發而觀之化為元龜童女遇之當宣王時而生女懼而棄之後褒人有獻而入之幽王幽王嬖之是謂褒姒鄭箋曰褒姒褒人所入之女似其字也今按太史公曰禹為姒姓其後分封以國為姓有褒氏蓋褒姒為褒人所入因冒褒姓非字也穆天子傳曰赤鳥之人丌好獻女子天子女聽女列為嬖人嬖人之名始此

冬大震電

箋按河圖曰陰陽相薄為雷元命包曰陰陽激為電開元占經曰冬三月有大雷聞千里

者人君絕令又曰天冬雷地必震教令挽則冬雷民饑

四年秦人伐西戎

箋按秦本紀莊公生子三人其長男世父曰戎殺我大父仲我非殺戎王

則不敢入遂將擊戎讓其弟襄公襄公二年戎圍犬邱世父擊之為戎人所虜歲餘復歸世父

夏六月隕霜

箋按詩序曰正月大夫刺幽王也其詩曰正月繁霜毛傳曰正月夏之四月鄭箋曰

夏之四月建巳之月而多恒寒若之異京房易傳曰夏霜君死國亡又春秋命歷序曰桀無道夏隕霜亦是類也

陳夷公薨

箋按陳世家武公卒子夷公說立是歲周幽王即位夷公三年卒据竹書是四年

五年世子宜臼出奔申

箋按小弁詩傳曰幽王娶申女生太子宜咎韋昭曰申姜姓之

國平王母家史記褒似生子伯服立以為后而放宜咎將殺之及冢瑣語曰幽王欲殺太子宜臼釋虎使

執之宜白叱之虎輒彌耳而服是其欲殺之事也時申為太子母家故太子宜咎奔申稱世子者幽王立伯服為太子故此稱世子也

皇父作都于向

箋按詩序曰十月之交大夫刺幽王也其詩曰皇父孔聖作都于向孔疏引杜

預曰河內軹縣西有地名向上

六年王命伯士帥師伐六濟之戎王師敗逋

箋按後漢西羌傳幽

王命伯士伐六濟之戎王軍敗伯士死焉

西戎滅葢

箋按韓非子周公旦已勝殷將攻商葢辛公甲曰大難攻小易服不如勝衆小以劫大乃

攻九夷而商葢服矣齊語曰桓公築五鹿中牟葢與壯丘以衛諸夏之地韋注四塞諸夏之關也是葢與

戎近山海經益
國在鉅燕南

冬十月辛卯朔日有食之

箋按小雅十月之交朔日辛卯日有食之亦孔之醜毛傳

曰之交日月之交會鄭箋曰周之十月夏之八月也
八月朔日日月交會而日食陰侵陽臣侵君之象日
辰之義日為君辰為臣辛金也卯木也又以卯侵辛
故甚惡之孔疏曰古之歷書亡矣今世有周歷魯歷
者蓋漢初為之其交無遲疾盈縮考日食之法而其
上年月已往參差是以漢世通儒未有以歷考此辛
卯日食者而王基獨云以歷校之自共以來當幽
王世無周十月夏八月辛卯交會欲以此會為共
之前其在共和之前則信矣而校之則無術說者或
據世以定義謬矣按孔疏以鄭箋為優不必據毛傳
定在幽世未審紀年皆夏正無周正也梁虞翻推之
謂在幽王六年乙丑者是也又劉向條災異封事曰

幽厲之際日月薄蝕而無光其詩曰朔月辛卯日有蝕之亦孔之醜學齋佔畢曰注云朔日也而乃謂之朔月蓋月朔之反辭猶書之月正元日乃正月元日也此說是矣魏了翁正朔考曰夫十月之交則十一月矣是周人朔月也故曰朔月辛卯正朔日食古人所忌故曰亦孔之醜今据竹書冬十月辛卯朔日有食之與毛傳合無用作朔月解也

七年虢人滅焦

箋按周本紀武王封神農之後于焦地理志云弘農陝縣有焦城故焦國也又

按水經注上陽虢仲之所都為南虢其大城中有小城古焦國也按幽王七年虢人滅焦即虢石父之國也呂氏春秋幽王染于虢公鼓蔡公敦是石父名鼓也

八年王錫司徒鄭伯多父命

箋按鄭語韋昭曰鄭姬姓周厲王之子宣王母弟桓

公友封于咸林令京兆鄭邑括地志故鄭城在華州
鄭縣西北三里世本桓公居棫林徒拾宋忠曰棫林
與拾皆舊鄭地疑棫林即咸林或字相近而譌也桓
公名多父或一名友爨與多字相近故也小雅十月
之交曰番惟司徒鄭箋曰幽王時司徒乃鄭桓公友
非此篇之所云番也因此知當為厲王時詩殊不審
幽王八年始命多父為司徒
八年以前猶是番為司徒也

王立褒姒之子曰伯服為太子

箋按周本紀幽王三年
嬖愛褒姒生子伯服太

子之母申侯女為后欲廢后并去太子用
褒姒為后以其子伯服為太子至是立之

九年申侯聘西戎及鄆

箋按王符潛夫論申城在宛北
序山之下漢地志東海繒縣故

繒國禹後鄭語史伯曰申繒西戎方強周室方騷將
以縱欲不亦難乎韋昭曰申姜姓幽王前后太子宜

白之舅也繒姒姓申之與國也西戎亦黨于申周襄
故戎程強也時太子宜咎在申申侯之聘西戎及鄆
者正以為
太子謀耳

十年春王及諸侯盟于太室

箋按杜預曰太室山在河南陽城縣西南戴延之述

征記曰高高山東謂太室西謂少室相去十七里嵩其總名也山海經曰太室之山也

秋九月桃杏實

箋按開元占經曰僖公即位隕霜不殺草梅李實梅李大樹此草為貴是君不

能伐也此云九月桃杏實亦是類也

王師伐申

箋按晉語曰褒姒生伯服逐太子宜咎而立伯服太子出奔申韋昭曰幽王欲殺宜咎以

成伯服求之于申中人弗予遂伐之

十一年春正月日暈

箋按是年為庚午石氏曰日旁有氣員而周匝名為暈又曰日暈者

軍營之象周環匝日無厚薄敵與軍勢齊等若無軍在外天子失御民多反叛洪範五行傳曰周幽之敗也日暈再重中暈赤外暈青一暈盡上下通在日中是歲有幽王之敗

申人鄆人及犬戎入宗周弑王及鄭桓公

箋按地理志東海繒縣故

繒國禹後詩王風序曰黍離閔宗周也鄭箋宗周鎬京也謂之西周魯語里革對成公曰幽王滅于戲周本紀褒姒不好笑幽王欲其笑萬方故不笑幽王為燧燧大鼓有寇至則舉燧火諸侯悉至而無寇褒姒乃大笑幽王說之為數舉燧火其後不信諸侯益亦不至幽王以號石父為卿用事國人皆怨石父為人巧佞善諛好利王用之又廢申后去太子也申侯怒與繒西夷犬戎攻幽王幽王舉燧火傲兵兵莫至遂

殺幽王驪山下韋昭曰殺幽王驪山戲水桓公死之一統志鄭桓公墓在華州城西三里

犬戎殺王子伯服執褒姒以歸

箋按周本紀曰虜褒姒盡取周賂而去

申侯魯侯許男鄭子立宜臼于申

箋按時鎬京殘破宜臼在申因就而立之

虢公翰立王子余臣于攜

原注是為攜王二王並立○箋按晉語曰褒姒有寵生伯

服韋昭曰伯服攜王也又按昭二十六年傳幽王用

愆厥位攜王奸命諸侯替之而建王嗣杜預曰攜王

幽王少子伯服也今據竹書幽王十一年犬戎殺王

子伯服號公翰立王子余臣于攜是為攜王時伯服

蚤已見殺而攜王乃余臣也

韋杜注以攜王為伯服皆誤

武王滅殷歲在庚寅二十四年歲在甲寅定鼎洛邑

箋按滅當作伐庚寅蓋武王十一年也是年周始伐
殷明年十二年辛卯滅殷十五年甲寅始遷鼎洛邑
後二年王崩無二十四年又定鼎當
作遷鼎成王十八年始如洛邑定鼎
至幽王二百五

十七年共二百八十一年自武王元年已卯已誤當作辛

至幽王庚午二百九十二年

箋按金仁山通鑿前編起武王之十三年已卯

至幽王之十一年庚午共二百九十二年已卯蓋辛
卯之譌相距十有二年據竹書是辛卯至庚午二百
八十一
年也

竹書統箋卷九

欽定四庫全書

竹書統箋卷十

翰林院檢討徐文靖撰

平王

名宜曰○箋按周本紀犬戎殺幽王於是乃即申侯而共立太子宜白是為平王

自東遷以後始紀晉事王即位皆不書

箋按此休文附注

元年辛未王東徙洛邑

箋按史記正義曰雒邑即王城也平王以前號東都又按地道

記王城去雒城四十里地理志河南郡有雒陽縣成周也有河南縣邾鄆王城也卜澗水東灑水西平王居之王城是也又卜澗水東是為成周故雒城是也郡國志河南周公所城雒邑也春秋謂之王城東城

門名鼎門北城門名乾祭注引博物記曰王城方七
百二十丈郭方七十里南望洛水北至邾山當平王
東遷之初尚未有王城之
名故竹書謂東徙洛邑也

錫文侯命

箋按書叙曰平王錫晉文侯桓鬯圭瓚作文
侯之命王若曰父義和丕顯文武天子稱同

姓伯父叔父晉於周同姓故以父稱之義和文侯字
左傳晉穆侯之夫人姜氏以條之役生太子命之曰
仇仇即文侯名也蓋文侯名仇字義和天子之於諸
侯稱其名正也今稱其字蓋尊之而不名也馬融王
肅徒見義和非晉侯名遂謂
父能以義和諸侯此鑿說也

晉侯會衛侯鄭伯秦伯以師從王入于成周

箋按史記
衛世家犬

戎殺幽王武公將兵往佐周平戎甚有功周平王命
武公為公鄭世家犬戎殺幽王并殺桓公鄭人共立

其子掘突是為武公秦本紀襄公以兵送周平王平王封襄公為諸侯是當日晉侯所會從王入于成周也者

二年秦作西時

箋按秦本紀祠上帝西時索隱曰襄公始列為諸侯自以居西時故作西時祠

白帝時止也言神靈之所依止也

魯孝公薨

箋按魯世家孝公懿公弟立二十七年卒子弗湟立是為惠公世本作弗皇

賜秦晉以邠岐之田

箋按秦本紀襄公以兵送周平王平王賜之岐以西之地曰戎無道

侵奪我岐豐之地秦能攻逐戎即有其地與誓封爵之襄公於是始國與諸侯通使林氏曰岐在邠西北無百里幽又在岐西北四百餘里

三年齊人滅祝

箋按周本紀武王封黃帝之後於祝服
虔曰東海郡祝其縣也至是齊人滅之

王錫司徒鄭伯命

箋按幽王八年錫桓公命為司徒後
死於犬戎之難至平王復命其子掘

突為司徒
是為武公

四年燕頃侯卒

箋按燕世家作頃侯二十年幽
王為犬戎所弑二十四年頃侯卒

鄭人滅虢

箋按左傳僖五年宮之奇曰虢仲虢叔封
之穆也賈逵曰虢仲封東虢制是也虢叔封

西號虢公是也孔仲達曰據傳鄭滅一虢晉滅一虢
不知誰是仲後誰是叔後按漢志東虢在滎陽傳曰

制巖邑也虢叔死焉是鄭所滅者
虢仲之後別有虢君字叔者也

五年秦襄公帥師伐戎卒于師

箋按詩序曰小戎美襄
公也秦本紀襄公十二

年伐戎而
至岐卒

宋戴公薨

箋按宋世家戴公二十九年周幽王為犬戎所殺三十四年戴公卒子武公司空立

六年燕哀侯卒

箋按燕世家頃侯二十年周幽王為犬戎所殺二十四年頃侯卒子哀侯立哀

侯二
年卒

鄭遷于溱洧

箋按詩鄭風譜曰幽王為犬戎所殺桓公死之其子武公與晉文侯定平王于東都

王城卒取史伯所云十邑之地左洛右濟前華後河食溱洧焉鄭詩曰溱與洧方渙渙兮說文溱作溱水

經注溱水出鄆城西北鷄絡塢下入洧洧水出河南密縣西南馬領山又東過鄭縣南溱水從西北來注

之溱水即溱水也通典鄭州新鄭有溱洧二水

七年楚子儀卒

箋按楚世家熊罻卒子熊儀立是為若
敖若敖二十年幽王為犬戎所弑周東

從二十七
年若敖卒

八年鄭殺其大夫關其思

箋按韓非子曰昔者鄭武公
欲伐胡先以其女妻胡君因

問于羣臣吾欲用兵誰可伐者大夫關其思對曰胡
可伐武公怒而戮之曰胡兄弟之國也子言伐之何
也胡君聞之以鄭為親已遂不備鄭鄭人襲胡取
之世本胡歸姓括地志胡城在豫州鄆城縣界

十年秦還于汧渭

箋按還當作遷秦本紀文公三年以
兵七百人東獵四年至汧渭之會曰

昔周邑我先秦嬴于此後即獲為諸侯乃卜居之占
曰吉即營邑之水經注渭水出首陽縣渭谷亭南谷
東逕郁夷逕平陽故城南汧水入焉汧水出汧縣之
蒲谷鄉弦中谷是汧渭之會也世紀文公徙汧括地

志故汧城在隴州
汧源縣西三里

十三年魏武公薨

箋按魏當作衛史記衛世家武公四十二年犬戎弑幽王五十五年卒又

按楚語曰武公年九十五作懿以自警常昭曰懿大雅抑之篇也毛序曰抑衛武公刺厲王亦以自警蓋王朝有雅列國有風惟刺王所以列之于雅若僅為飲酒悔過之詩則當同淇澳列之於風烏在列之於雅哉考年表衛武公以宣王十六年即位其齒當四十餘厲王無道已熟悉之又歷五十餘年則幽平時也武公有感于時事不敢顯言王失追刺厲王以寓其意其在於今興迷亂于政顛覆厥德荒湛于酒非必睿聖武公身有是事當時必有所指可知天方艱難曰喪厥國取譬不遠昊天不忒豈非以厲王奔羸而欲後人之鑒之故以為刺王而列之于雅也紀年衛武公薨平王十三年與史記衛世家合

十四年晉人滅韓

箋按史記索隱曰左傳邠晉應韓武之穆也則韓是武王子詩稱韓侯出

祖則是有韓而先滅也今据竹書成王十三年王師燕師城韓王錫韓侯命是時韓在北方與燕近宣王四年王命蹇父如韓韓侯來朝則又改封於韓原詩序曰韓奕尹吉甫美宣王也能錫命諸侯鄭箋韓姬姓之國也後為晉所滅故大夫韓氏以為邑名焉孔疏曰晉之滅韓未知何君之世蓋晉文侯輔平王為方伯之時滅之也晋世家文侯二十四年滅韓韓世家韓之先與周同姓其後苗裔事晉得封于韓原蓋考之不詳耳

十八年秦文公大敗戎師于岐來歸岐東之田

箋按秦本紀文

公十六年以兵伐戎敗走於是文公遂收周餘民有之地至岐岐以東獻之周按稽古錄以秦文公大敗

戎師在平王
二十一年誤

二十一年晉文侯殺王子余臣于攜

箋按事在晉文侯三十一年史記晉

世家周作晉文侯命王若曰父義和丕顯文武能慎明德索隱曰尚書文侯之命是平王命晉文侯仇之語今此乃是襄王命文公重耳之事代數懸隔勳策全乖又按攜王號公翰所立翰蓋號石父子也

二十三年宋武公卒

箋按宋世家武公女為魯惠公夫人生魯桓公十八年武公卒

二十四年秦作陳寶祠

箋按秦本紀文公十九年得陳寶漢郊祀志云文公獲若石云

于陳倉北阪城祠之其神來若雄雉其聲殷殷然野鷄夜鳴以一牢祠之號曰陳寶韋昭曰在陳倉縣寶而祠之故曰陳寶括地志寶鷄神在岐州陳倉縣東二十里故陳倉城中

二十五年晉文侯甍

甍按晉世家文侯六年犬戎殺幽王三十五年文侯仇卒

秦初用族刑

箋按秦本紀寧公生子三人長男武公為太子武公弟德公同母魯姬子生出子寧

公卒大庶長弗忌威壘三父廢太子而立出子為君出子六年三父等復共令人賊殺出子復立故太子

武公武公三年誅三父等而夷三族以其殺出子也

二十六年

丙申晉昭公元年

晉封其弟成師于曲沃

箋按襄公二十三年

公羊傳曲沃者何晉之邑也晉世家文侯卒子昭侯伯立昭侯元年封文侯弟成師於曲沃詩序揚之水刺晉昭公也昭公分國以封沃沃威強昭公微弱國人將叛而歸沃焉郡國志河東聞喜邑本曲沃劉昭曰曲沃在縣東北與晉相去六七百里据左傳在春秋前魯惠公二十四年

三十二年晉潘父弑其君昭侯納成師不克立昭侯之

子孝侯

箋按左傳在魯惠公三十年

晉人殺潘父

箋按晉世家成師封曲沃號為桓叔靖侯庶孫欒賓相桓叔桓叔是時年五十八矣

好德晉國之眾皆附焉七年晉大臣潘父弑其君昭侯而迎曲沃桓叔桓叔欲入晉晉人發兵攻桓叔桓叔敗還歸曲沃晉人共立昭侯子平為君是為孝侯誅潘父

三十三年

癸卯晉孝侯元年

楚人侵申

箋按杜預曰申今南陽宛縣是也

三十六年衛莊公卒

箋按衛世家武公卒子莊公揚立二十三年莊公卒太子完立是為

桓公

王人戍申

箋按詩序揚之水刺平王也不撫其民而遠屯戍于母家周人怨思焉鄭箋曰平王母家

中國在陳鄭之南迫近強楚王室微弱而數見侵伐王是以戍之

四十年齊莊公卒

箋按齊世家成公卒子莊公購立二十四年周東徙維六十四年莊公卒

晉曲沃桓叔成師卒子緝立是為莊伯

自是晉侯在翼稱翼侯箋按

晉世家考侯八年曲沃桓叔卒子緝代桓叔是為曲沃莊伯稽古錄平王四十一年曲沃莊伯鮮元誤据竹書鮮當作緝少一年

四十一年

辛亥莊伯元年

春大雨雪

箋按爾雅曰雪與雨雜下曰霰春秋考異郵曰庚申

大雪雪深七尺并者丈四尺謝惠連雪賦盈尺則呈瑞于豐年衰丈則表沴于陰德京房易傳曰凡雪者

勝陰氣
也

四十二年狄人伐翼至于晉郊

箋按索隱曰翼本晉都自孝侯已下一號翼侯

平陽絳邑縣東翼城是也

宋襄公薨

箋按襄誤當作宣周平王二十三年宋武公卒宋世家武公卒子宣公力立宣公有太子

與夷十九年宣公病讓其弟和亦三讓而受之宣公卒弟和立是為穆公

魯惠公使宰讓請郊廟之禮王使史角如魯諭止之

按

呂氏春秋曰魯惠公使宰讓請郊廟之禮于天子桓王使史角往惠公止之其後在于魯墨子學焉据本紀平王四十九年魯隱公即位五十一年平王崩太子洩父早死立其子林是為桓王桓王平王孫也魯

惠公請郊廟之禮在平王四十二年
下距桓王即位十一年呂氏說繆

四十七年晉曲沃莊伯入翼弑孝侯晉人逐之立孝侯

子郤

箋按郤世本作郤他本亦作都

是為郤侯

箋按左傳隱五年春曲沃莊伯以鄭人邢人伐

翼王使尹氏武氏助之翼侯奔隨六年春翼九宗五正項父之子嘉父逆晉侯于隨納諸郤晉人謂之郤侯春秋地名攷畧曰今介休縣東有隨城世本唐叔虞居郤宋表曰郤地今在大夏括地志故郤城在慈州昌寧縣東二里時晉人迎翼侯于隨納諸郤後乃復入于翼也左傳謂在魯惠公四十五年

四十八年

戊午晉鄂侯元年

無雲而雷

箋按開元占經曰天書云無雲而雷是謂天狗所當之國必有甲兵洪範五行傳秦二世

元年無雲而雷雷陽雲陰也有雲然後有雷有臣然後有君也無雲而雷示君獨處無人民也

魯惠公卒

箋按魯世家孝公卒子惠公立四十六年惠公卒庶長子息攝當國行君事是為隱公

四十九年

已未魯隱公元年春秋始此

魯隱公及邾莊公盟于姑蔑

箋按春秋隱公元年三月公及邾儀父盟于蔑杜預

曰邾今魯國鄒縣也蔑姑蔑魯國卞縣南有姑城杜預地志姑蔑故城在兗州泗水縣東四十五里又按蔑

公穀二傳作昧

五十一年春二月乙巳日有食之

箋按隱三年歲在辛酉二月乙巳朔日有

食之此不書朔失攷也春秋日食三十六其不書朔者八左氏傳曰其不書朔官失之也公羊傳曰不言

朔者二日也穀梁傳曰不言朔者食晦也隋律歷志曰今以甲子元歷推算俱是朔日隱公三年二月乙巳日有食之推合乙巳朔莊公十八年春三月日有食之推合壬子朔僖公十二年三月庚午日有食之推合庚午朔十五年夏五月日有食之推合癸未朔元郭守敬授時歷又推合宣十年四月丙辰朔襄十五年八月丁巳朔文元年二月癸亥朔皆闕朔字左傳以為官失之是也穀梁誤以為食晦如果為食晦僖十六年己卯晦成十六年甲午晦皆書此何以不書明是日食在朔而官失之耳公羊以為春秋不書晦尤謬

三月庚戌王陟

箋按是年辛酉春秋魯隱公三年春三月庚戌天王崩傳曰壬戌天王崩赴以

庚戌故書之杜氏曰周平王也實以壬戌崩欲諸侯之速至故遠日以赴春秋不書實崩日而書遠日者

即傳其偽以懲
臣子之過也

桓王

名林○箋按周本紀平王崩太子洩父早死立其子林是為桓王

元年壬戌

十月莊伯以曲沃叛伐翼

箋按左傳隱五年夏六月曲沃叛王蓋先時曲沃伐翼王

使尹氏武氏助翼侯至是而曲沃叛王不遵王命復伐翼也杜氏曰曲沃晉別封戎師之邑莊伯成師子也翼晉舊都

公子萬救翼荀叔軫追之至于家谷

箋按水經注澮水出澮山西逕翼城

南又西逕榮庭城南與乾河合即教水之林川也西北至澮交入澮又有女家水出于家谷竹書莊伯以

曲沃叛伐翼公子萬救翼
荀叔軫追之至于家谷

翼侯焚曲沃之禾而還

箋按水經注澮水西南合黑水流逕翼城北右引北川水亂流

西南入澮澮水又西南與諸水合謂之澮交竹書莊伯十二年翼侯焚曲沃之禾而還

翼侯伐曲沃大捷武公請成于翼至相而還

附注相一作桐箋

按水經注澮水又西逕仲邨邨北又西逕桐鄉城北竹書翼侯伐曲沃大捷武公請成于翼至洞庭乃返者也朱謀埤曰洞一讀作桐又曰庭當作渦洞渦水出沾縣北山又西到晉陽縣南西入于汾武公莊伯子鱣也請成求成也

二年王使虢公伐晉之曲沃

箋按左傳隱五年秋王命虢公伐曲沃而立哀侯于

翼杜注春翼侯奔隨故立其子光又六年傳鄂侯注
前年桓王立翼侯之子於翼故不得復入翼別居鄂
不知翼人迎晉侯于隨而納諸鄂事在春秋前二年
故經不書杜謂晉不告亂故不書誤也又晉侯始納
諸鄂因謂之鄂侯杜謂不得復入翼故別居鄂亦誤
以史記世家合之竹書鄂侯卒而始立其子哀侯于
翼非鄂侯不
得復入翼也

晉鄂侯卒曲沃莊伯復攻晉晉立鄂侯子光是為哀侯

箋按晉世家鄂侯二年魯隱公初立鄂侯六年卒曲
沃莊伯聞晉鄂侯卒乃與兵伐晉周平王使虢公將
兵伐曲沃莊伯莊伯走保曲沃
晉人共立鄂侯子光是為哀侯

三年甲子

晉哀侯
光元年

四年曲沃莊伯卒子稱立是為武公

箋按林氏曰魯隱公七年晉哀侯二

年曲沃莊伯卒子稱代立是為武公
今據傳是魯桓公三年云隱公誤

尚一軍

箋按周禮大司馬序云凡制軍萬有二千五百人為軍王六軍大國三軍次國二軍小國一軍

五年

曲沃武公元年○箋按竹書桓王五年號公忌父始作卿士于周

芮人乘京荀人董伯皆叛曲沃

箋按地理志馮翊臨晉有芮鄉故芮國詹桓伯

云駘芮吾西土是也此芮人乘京之芮漢河北縣地後周改芮城唐志陝州芮城縣是也臣瓚曰今河東有荀城古荀國左傳文公六年晉人改蒐于董杜注河東汾陰有董亭是也

十一年

晉小子侯元年

曲沃獲晉哀侯

箋按桓三年春曲沃武公伐翼次于陘庭韓萬御戎梁弘為右逐翼侯于汾隰

騶絃而止夜獲之及樂共叔

晉人立哀侯子為小子侯

箋按晉世家哀侯八年晉侵陘廷陘廷與曲沃武公謀九

年伐晉于汾旁虜哀侯晉人乃立哀侯子小子為君是為小子侯小子元年曲沃武公使韓萬殺所虜晉哀侯賈逵曰韓萬曲沃桓叔之子莊伯弟

芮伯萬出奔魏

箋按桓三年傳芮伯萬之母惡芮伯之多寵人也故逐之出居于魏

十二年王師秦師圍魏

箋按詩魏國疏曰魏世家絕不知所封為誰故言周以封同姓

子魯詩世學曰畢公高文王庶子初封畢伯成王進為魏侯十餘世晉獻侯詭諸滅之罪萬降于晉為大

夫得食邑于魏九傳生魏斯斯請周威王命為魏文侯而與趙籍韓虔廢晉靖公為家人文侯孫則梁惠

王罃也又六傳至魏王假為秦所滅

取芮伯萬而東之

箋按寰宇記陝州芮城縣北五里有魏城左傳桓四年秋秦師侵芮敗焉

冬王師秦師圍魏執芮伯以歸杜氏曰三年芮伯出居魏芮更立君秦為芮所敗故以芮伯歸將欲納之

左傳桓十年秦人納芮伯萬于芮

十三年冬曲沃誘晉小子侯殺之

箋按桓七年傳冬曲沃伯誘晉小子

侯殺之林氏曰以計誘而殺之非用兵也晉世家小子之四年曲沃武公誘召晉小子殺之是也

晉曲沃滅荀以其地賜大夫原氏黯是為荀叔

箋按地理志扶

風拘邑應劭曰荀侯賈伯伐晉是也臣瓚曰汲郡古文晉武公滅荀以賜大夫原氏黯是為荀叔又云文公城荀然則荀當在晉之境內不得在扶風也今河東有荀城古荀國師古曰瓚說是也

戎人逆芮伯萬于郊

箋按郊當作邲水經注戎人逆芮伯萬于邲斯城亦或伯萬之故壘

也然則郊蓋為邲之譌矣

十四年王命虢仲伐曲沃立晉哀侯弟緡于翼為晉侯

箋按春秋桓八年冬王命虢仲立晉哀侯弟緡于晉杜氏曰虢仲王卿士虢公林父

十五年

晉侯緡元年

十六年春滅翼

箋按左傳桓八年春滅翼杜注曰曲沃滅之又水經注曰詩譜言晉穆侯遷都

于絳孝侯改絳曰翼郡國志河東絳邑縣有翼城劉昭注城在縣東八十里至是為武公所滅

十九年鄭莊公卒

箋按鄭世家武公卒寤生立是為莊公莊公二十七年始朝周桓王桓王

怒其取禾弗禮也三十七年莊公不朝周周桓率陳蔡虢衛伐鄭王師大敗祝瞻射中王臂四十二年鄭

卒莊公

二十三年三月乙未王陟

箋按是年甲申春秋桓公十五年三月乙未天王崩林堯

叟曰桓王至莊三年葬一統志桓王陵在澠池縣北九十七里桓王山上

莊王

名佗○箋按周本紀桓王崩子莊王佗立稽古錄作莊王仲字之訛也

元年乙酉

曲沃尚一軍異于晉

箋按周禮大司馬職凡制軍萬有二千五百人為軍王六軍大國三

軍次國二軍小國一軍晉土地雖大時曲沃初并晉國故尚一軍以別于晉也

六年五月葬桓王

箋按桓王之崩七年矣至是始葬林注謂桓王至莊三年葬者莊王之六

年魯莊公之三年也

十五年王陟

釐王

名胡齊○箋按周本紀莊王崩子釐王胡齊立

元年庚子

春齊桓公會諸侯于北杏以平宋亂

箋按莊王十二年齊桓公小白元年

至是立五年矣春秋莊公十有三年春齊侯宋人陳人蔡人邾人會于北杏傳曰會于北杏以平宋亂林氏曰北杏齊地衣裳之會一序齊于諸侯之上而獨書爵始伯之辭也自是無特相會者矣王風之什絕筆于莊王而僖王之立齊桓之伯皆在是年此王伯興衰之機也又左傳疏曰平宋亂者宋萬已誅宋新立君其位未定齊桓欲修霸業為會以安定之地名考畧曰北杏在東阿縣境

三年曲沃武公滅晉侯緡以寶獻王

箋按晉世家曲沃武公伐晉侯緡滅

之盡以其寶器
賂獻于周僖王

王命武公以一軍為晉侯

箋按左傳莊公十六年冬王使虢公命曲沃莊伯以一軍

為晉侯林堯叟曰周制大國三軍次國二軍小國一軍晉本大國自曲沃武公覆滅宗國僖王命以一軍

為晉遂從小國之制又按魯閔公元年晉始作二軍
僖二十七年晉作三軍三十一年晉作五軍成三年

晉作六軍
遂僭王矣

四年

晉武公三十八年

晉猶不與齊桓公之盟

附注晉侯緡是年滅○箋按春

秋魯莊公十有五年書齊侯宋公陳侯衛侯鄭伯會
于郵十有六年冬十有二月書齊侯宋公陳侯衛侯
鄭伯許男滑伯滕子同盟于幽魯莊公十五年十六
年正僖王三年四年盟皆無晉是晉于是時猶不與
齊桓公之盟也

五年晉武公卒

箋按晉世家武公卒于獻公詭諸立

王陟

箋按春秋魯桓十五年書桓王崩杜預曰自此以
來周有莊王又有僖王崩葬皆不見經傳今据竹

書莊王十五年陟僖王五年陟史記周本紀亦言釐王胡齊立五年崩杜云不見經傳非

惠王

名閻○箋按周本紀釐王崩子惠王閻立世本名母涼韋昭注國語曰惠莊王之孫僖王之子惠王

母涼也為子頹所篡出居于鄭鄭厲公納之

元年

乙巳晉獻公元年

晉獻公朝王如成周

箋按國策注洛陽周公所營下都以遷殷頑民是為成周然成周實

東都之總名非專指雒邑也呂氏曰豐鎬宗廟之所在故曰宗周東都王道之所成故曰成周

周陽白兔舞于市

箋按水經注涑水出河東聞喜縣東山黍葭谷又西過周陽邑南具城南

臨涑水北倚山原竹書晉獻公二十五年翟人伐晉周陽白兔舞于市即是邑也今据竹書周陽白兔舞

于市事在晉獻公元年晉世家獻公二十五年晉伐
翟翟亦擊晉于鬻桑左傳作采桑杜氏曰平陽北屈
縣西南有采桑津水經注以周陽兔舞在
是時据竹書則晉獻公如成周時所見也

二年王子頹亂王居于鄭

箋按莊公十九年左傳初王
姚嬖于莊王生子頹子頹有

寵為國為之師及惠王即位取為國之圃以為圃邊
伯之宮近於王宮王取之王奪子禽祝跪與詹父田
而收膳夫之秩秋五大夫奉子頹以伐王不克出奔
溫蘇子奉子頹以奔衛衛師燕師伐周冬立子頹二
十年春鄭伯和王室不克夏鄭伯遂以王歸王處于
櫟秋王及鄭伯入于鄆遂入成周取其寶器而還冬
王子頹享五大夫樂及徧犇鄭伯間之見號叔曰盍
納王乎二十一年夏同伐王城鄭伯將王自圍門入
號叔自北門入殺王子
頹及五大夫王乃入

鄭人入王府多取玉玉化為蜮射人

箋按鄭人溫人也周本紀邊伯等五

人作亂伐惠王惠王奔溫已居鄭之櫟左傳溫蘇忿生邑桓王奪以予鄭者是時溫已屬鄭雖居溫而直可言鄭也又王府當作玉府周禮天官之屬有玉府掌王之金玉玩好凡良貨賄之藏是也鄭人入王府玉化為蜮射人春秋莊公十八年有蜮注云蜮短狐也蓋以含沙射人為災也五行傳曰詩云為鬼為蜮則不可得蓋氣精也然則玉化為蜮射人者亦氣精之類也

九年晉城絳

箋按左傳莊二十六年夏晉士蒍城絳以深其宮杜曰絳晉所都也今平陽絳邑縣

水經注曰按詩譜言晉穆侯遷都于絳孝侯改絳曰翼獻公北廣其城方二里命之為絳是也晉世家謂獻公八年城聚都之命曰絳晉始都絳未足据也

十六年晉獻公作二軍滅耿以賜大夫趙夙滅魏以賜

大夫畢萬

晉滅于大夫韓趙魏萌于此○箋按閔公元年晉作二軍公將上軍太子申生將下軍趙

夙御戎畢萬為右以滅耿滅霍滅魏還為太子城曲沃賜趙夙耿賜畢萬魏以為大夫地志河東北縣詩魏國左傳晉賜畢萬魏卜偃曰魏大名也其地于今為河中永樂非元城之魏也漢以大名名此失矣又地志皮氏縣有耿鄉故耿國都城記曰耿嬴姓國也地理通釋耿在河中府龍門縣東南括地志晉州霍邑縣霍太山在東韋昭曰周文王子霍叔武之國也

十七年衛懿公及赤翟戰于洞澤

附注曰洞當作洞箋按春秋閏二年狄

人伐衛衛懿公好鶴鶴有乘軒者將戰國人受甲者皆曰使鶴鶴實有祿位余焉能戰公及狄人戰于瑩

澤衛師敗績遂滅衛杜注曰此熒澤當在河北竹書
洞澤即熒澤也又按宣十三年傳赤翟伐晉及清十
五年晉師滅赤翟潞氏十六年晉士會帥師滅赤狄
甲氏及留吁鐸辰成公三年晉卻克衛孫良夫伐廩
咎如討赤翟之餘是赤翟種類甚多其伐衛戰洞澤
者未審誰也周語史伯曰當成周者北有衛燕翟鮮
虞路洛泉徐蒲韋昭注曰徐赤翟隗姓蒲赤翟隗姓
則赤翟與衛近者乃徐蒲也後漢郡國志樂安臨濟
本狄國劉昭注引地道記
云狄伐衛懿公其說謬矣

十九年晉獻公會虞師伐虢滅下陽

箋按左傳僖二年
晉荀息請以屈產

之乘垂棘之璧假道于虞以伐虢虞公許之且請先
伐虢宮之奇諫不聽遂起師夏晉里克荀息帥師會
虞師伐虢滅下陽杜氏曰
下陽虢邑在河東大陽縣

號公醜奔衛

箋按僖五年晉侯復假道于虞以伐號宮之奇諫弗聽許晉使八月甲午晉侯圍上

陽問於卜偃曰吾其濟乎對曰克之公曰何時對曰童謠云丙之晨龍尾伏辰衿服振振取號之旂鷄之賁賁天策焯焯火中成軍其九月十月之交乎丙子旦日在尾月在策必是時也冬十二月丙子朔晉滅號號公醜奔京師唐曆志日度議曰丙子旦日在尾月在策策入尾十二度新曆是歲十月丙子定朔日月合尾十四度於黃道日在古曆尾而月在策故曰龍尾伏辰於古距張中而曙直鷄火之末始將西降故曰賁賁又紀年號公奔衛左氏傳云奔京師史記晉世家晉獻公二十二年冬滅號號公醜奔周皇覽曰號公冢在河內溫縣郭東濟水南其城南有號公臺河內本衛地後乃屬周曰衛曰周曰京師一也

公命瑕父呂甥邑于國都

箋按國誤當作號左傳僖十五年晉侯使卻乞告瑕呂飴

甥且召之杜注瑕呂飴甥即呂甥也蓋姓瑕呂名飴
 甥字子金晉侯開秦將許之平故告呂甥召使迎已
 据竹書瑕父呂甥甥先食采于瑕故曰瑕父不得以
 瑕呂為姓明矣文十三年晉使詹嘉處瑕杜氏曰賜
 其瑕邑亦猶是矣時獻公滅虢虢公奔衛命瑕父呂
 甥邑于虢都以鎮撫之僖五年傳注上陽虢國都在
 弘農陝
 縣東南

二十五年春狄人伐晉

箋按晉世家獻公二十五年晉
 伐翟翟以重耳故亦擊晉于齧

桑

王陟

箋按僖公七年秋七月盟于甯母閏月惠王崩林
 氏曰惠王實以前年閏月崩以今年十二月丁未

告傳曰王人來告喪難故也
 是以緩杜氏曰有叔帶之難

襄王

名鄭。箋按周本紀惠王崩子襄王鄭立。

元年庚午

箋按周語曰惠后之難王出在鄭韋昭曰惠后周惠王之后襄王繼母陳媯也陳媯有寵

生子帶將立未及而卒子帶奔齊王復之又通于襄王之后隗氏王廢隗氏周大夫顏叔桃子奉帶以翟師伐周王出適鄭處于汜在魯僖二十四年史記鄭世家鄭文公三十七年襄王出奔鄭鄭文公居王于汜三十八年晉文公入襄王成周

晉獻公卒

箋按春秋僖公九年九月戊辰諸侯盟于葵丘甲子晉侯佹諸卒杜氏曰未同盟而赴以

名甲子九月十一日戊辰十五日也書在盟後從赴按甲子不當在戊辰後穀梁傳亦作甲子惟公羊傳作甲戌是在戊辰後六日今當從之

立奚齊里克殺之及卓子

艾按莊子長梧子曰驪之姬艾封人之子也晉國之始得

之也涕泣沾襟及其至于王所與王同筐床食芻豢而後悔其泣也左傳閔四年初晉獻公欲以驪姬為

夫人立之生奚齊其娣生卓子及將立奚齊既與中大夫成謀姬謂太子曰君夢齊姜必速祭之太子祭

于曲沃歸胙于公毒而獻之姬泣曰賊由太子太子奔新城十二月戊申縊于新城又僖九年傳九月晉

獻公卒初獻公使荀息傅奚齊公疾召之曰以是藐諸孤辱在大夫具若之何稽首而對曰臣竭其股肱

之力其濟君之靈也不濟則以死繼之冬十月里克殺奚齊于次荀息將死之人曰不如立卓子而輔之

荀息立公子卓以葬十二月里克殺公子卓于朝荀息死之林堯叟曰卓子驪姬之娣所生子也又按卓

子史記作悼子

立夷吾

箋按晉世家申生自殺于新城此時重耳夷吾來朝驪姬因譖二公子申生之藥昨二公子知

之重耳走蒲夷吾走屈二十二年獻公乃使兵伐蒲重耳踰垣遂奔翟使人伐屈屈城守不可下二十三年獻公遂使賈華等伐屈屈潰夷吾遂奔梁二十九年獻公卒里克殺奚齊悼子列女傳曰鞭殺驪姬于市

二年

辛未晉惠公元年○箋按晉世家里克等已殺奚齊悼子使人迎重耳于翟重耳謝曰大夫其更立

他子里克迎夷吾于梁夷吾欲往乃使卻芮厚賂秦約曰即得入請以河西之地予之秦穆公乃發兵送

夷吾于晉是為惠公

晉殺里克

箋按春秋僖十年夏晉殺其大夫里克公羊傳曰里克弑二君則曷為不以討賊之辭言

之惠公之大夫也然則孰立惠公里克也里克立惠公則惠公曷為殺之惠公曰爾既殺夫二孺子矣又將圖寡人為爾君者不亦病乎于是殺之

三年雨金于晉

箋按天鏡曰天雨金國有兵喪稽古錄曰莊王三年夏戎伐京師王子帶召之

也是亦有兵之應也

七年秦伯涉河伐晉

箋按僖十五年傳晉侯之入也賂秦伯以河內列城五東盡虢略南

及華山內及解梁城既不與故秦伯伐晉卜徒父筮之吉涉河侯車敗詰之對曰乃大吉也三敗必獲晉君其卦遇蠱曰千乘三去三去之餘獲其雄狐夫狐蠱必其君也三敗及韓晉侯謂慶鄭曰寇深矣若之何對曰君實深之可若何九月晉侯逆秦師使韓簡視師壬戌戰于韓原晉戎馬還渾而止秦獲晉侯

以歸秦許晉平十月改館晉侯十一月
晉侯歸于是秦始征晉河東置官司焉

十五年晉惠公卒子懷公圍立

箋按晉世家惠公八年使太子圉質秦十三年

惠公病子圉遂亡歸晉十四年九月惠公卒太子圉立是為懷公時魯僖公二十三年也

秦穆公帥師送公子重耳圍令狐桑泉白衰皆降秦師

箋按左傳僖二十四年春王正月秦伯納之濟河圍令狐入桑泉取白衰闕駟曰令狐今猗氏也杜預曰

桑泉在解縣西郡國志河東解縣有白城

狐尾與先軫禦秦至于廬柳

箋按狐尾當作狐毛禦秦當作禦晉左傳僖二十三

年懷公命無從亡人期期而不至無赦狐突之子毛及偃從重耳在秦弗召冬懷公執狐突乃殺之僖二

十四年甲午晉師軍于廬柳杜氏曰懷公遣軍拒重耳蓋是時狐毛先軫皆從重耳在秦至是聞晉師在廬柳故使禦之也春秋地名攷略曰今解縣西北有廬柳城

乃謂秦穆公使公子絳來與師言次于郇盟于軍箋按

十四年傳秦伯使公子絳如晉師師退軍于郇辛丑狐偃及秦晉之大夫盟于郇林堯叟曰晉師從秦命納文公故退師預注解縣西北有郇城

公子重耳涉自河曲箋按郡國志河東有蒲坂沙丘亭韋昭曰即河曲左傳僖二十四年

二月壬寅公子入于晉師丙午入于曲沃丁未朝于武宮賈逵曰文公之祖武公廟也

十六年乙酉晉文晉殺子圉箋按晉世家重耳即位為晉君羣臣皆往懷公圍奔

高梁戊申使人殺懷公杜氏曰高梁在平陽楊縣西南時魯僖公二十四年也

十七年晉城荀

箋按桓王五年荀人叛曲沃沃十三年晉曲沃滅荀至是城之地理志注臣瓚曰

文公城荀即謂此也

二十年周襄王會諸侯于河陽

箋按春秋僖二十八年冬天王狩于河陽壬申

公朝于王所杜注河陽晉地今河內有河陽縣晉實召王為其辭逆而意順故經以王狩為辭壬申十月十日又按晉世家晉文公五年四月宋公齊將秦將與晉侯次城濮己巳與楚兵合戰楚兵敗甲午晉師還至衡雍作王宮于踐土五月丁未獻楚俘于周天子使王子虎命晉侯為伯癸亥王子虎盟諸侯于王庭壬午晉度河北歸國行賞冬晉侯會諸侯于温欲率之朝周力未能忍其有畔者乃使人言周襄王狩

于河陽壬申遂率諸侯朝王于踐土孔子讀史記至
文公曰諸侯無召王王狩河陽者春秋諱之也郡國
志河南卷縣有垣雍城或曰古衡雍括地志衡雍故
城在鄭州原武縣西北七里郭緣生述征記曰踐土
今治坂城是魏土地記治坂城南臨孟津河一統志
河陽城在孟縣西南三十里春秋天王狩于河陽即
此

二十二年齊師逐鄭太子齒奔城張南鄭

箋按水經注
涑水又西南

逕解縣故城南又西南逕瑕城又西南逕張陽城東
竹書齊師逐鄭太子齒奔城張南鄭者也漢書之所
謂東張矣涑水又西南屬于陂陂分為二東陂世謂
之晉興澤西陂即張澤也西北去蒲坂二十五里

二十四年晉文公卒

箋按春秋僖三十二年冬十有二
月巳卯晉侯重耳卒晉世家文公

卒子襄公歡立据僖二十八年傳楚子曰晉侯在外十九年矣而果得晉國杜氏曰晉侯生十七年而亡亡十九年而反凡三十六年至此四十矣是卒年四十四也

二十五年甲午晉襄公驩元年○箋按左傳僖三十三年夏四月辛巳晉敗秦師于殽獲百里孟明

視西乞術白乙丙以歸遂墨以葬文公晉于是始墨

三十年洛絕于洵箋按水經注洛水又東過偃師縣南又北陽渠水注之竹書晉襄公六年

洛絕于洵即此處也

三十一年晉襄公卒箋按晉世家襄公七年八月襄公卒太子夷臯少晉人以難故欲立

長君趙盾使士會于秦迎公子雍賈季亦使人召公子樂于陳太子母繆嬴日夜抱太子以號泣于朝曰

先君何罪其嗣亦何罪舍適而外求君將安置此趙盾與諸大夫皆患繆嬴且畏誅乃背所迎而立太子夷臯是為靈公

三十二年

辛丑晉靈公夷臯元年

三十三年王陟

箋按春秋魯文公八年秋八月戊申天王崩冬十月公孫敖如京師不至以幣

奔莒弔喪之禮缺矣至九年春毛伯來求金則魯不赴弔又幾年三月

頃王

箋按周本紀襄王崩子頃王壬臣立


元年癸卯

六年彗星入北斗

箋按星傳曰北斗九星在紫微西垣外第一曰天樞去極二十三度半入

張宿九度二曰天璇去極三十度入張宿十二度半
三曰天璣去極三十度入翼宿十三度四曰天權去
極二十三度入翼宿十七度五曰玉衡去極二十八
度入軫宿十二度半六曰闔陽去極三十度入角宿
四度少七曰搖光去極三十五度入角宿九度又一
星曰弼在第七星右不見又一星曰輔在第六星左
常見去極三十度入角宿三度宋玉九辨曰天有九
星以正機衡謂此也春秋魯文十四年秋七月有星
孛入于北斗周內史叔服曰不出七年宋齊晉之君
皆將死亂後十六年宋襄夫人使召公田孟諸而弑
之十八年齊閻職及邴馯弑懿公于申池宣公二年
晉趙穿弑靈公于桃園以甲子計之魯文公元年乃
周襄王二十六年也至于文公十四年則襄王崩後
七年事矣韋昭洞記曰頃王六年彗星入北斗晉趙
盾率諸侯平周亂立王子樊是為匡王時竹書未出
而所云若是則紀年信不誣矣但匡王名班韋乃云

樊未知何据又孝經鈞命决曰周襄王不能
事其母孛入北斗不知為頃王六年事矣



竹書統箋卷十